

DISPUTATIO

feu

JUDICIUM MEDICUM

DE

CEREVISIA
NUMBURGENSI*Quod*

Auxiliante DEO

&

Anniente Gratioso Collegio Medico

In

ILLUSTRI ACADEMIA JENENSI,

*Sub PRÆSIDIO*DN. JACOBI Wolff / Phil.
atque Med. Doct. & Academici
Curiosi,*Publico eruditorum examini commendat*JOH. RAPHAEL PRETTENUS,
Numburgens.*die 28. Junii, MDCLXXXIV.**horis locoque solitis.*

J E N Æ,

Stanno JOH. DAV. WERTHERI, Typogr. Duc.



I. N. S. S. T.

PROOEMIUM.



On solum amor, quò Patriæ atq; veritati ad-
 stricti sumus, nos ad præsens hoc iudicium
 depromendum permovit, sed etiam ipsius
 Cerealis potus Numburgensis boni ac lau-
 dabilis usus medicus suasit nobis vindicias
 moliri & amoliri malevolorum sive malè
 peritorum aut informatorum convitia vel
 effectus sinistros, quos de eo consignatos
 in quibusdam autoribus deprehendimus. Si verò Numbur-
 gensium cerevisiam, medicam vel potum medicatum, aut
 eruditorum nuncuparemus, nihil absurdi pronunciaremus,
 uti de hoc partim in *dissertatione de literatorum potu* mentem
 nostram uberius exposuimus & ex subsequentibus ulterius
 patebit. Si qui itaque non ipsimet degustarint illam cere-
 visiam, vel loci ipsius conditionis, morborumque illic ob-
 viorum gnari sint, ac relationibus sublesta fide, jocove ni-
 tentibus fidant, facillimè iidem falli aliosque iterum non
 minùs fallere possunt. Sic celebris quondam, nec post fata
 inglorius *Herm. Conringius* & *Schefferus* in *dissertat. de intro-
 duction. ad Medicin.* p. 228. § 233. scribunt: Italos non posse
 veri quid de cerevisia tradere, cùm multi non degustarint
 illam. Propterea etiam *Cardanum* (qui libr. 3. de *tuenda sa-
 nitate* c. 88. vim calefaciendi cerevisiæ inesse scribit) tanquam
 hominem Italum in exploranda cerevisia minùs exercitatum
 statuit *Mart. Schookus* de *cerevisia* c. 18. p. 173. Idem hic
 autor pluribus in locis citati libri iudicium suum de varia ce-

revisia suspendit, quia se experientiâ destitutum fatetur.
 Quid mirum itaque, quod, quia nationibus ejusmodi exter-
 ris non admodum nota est cerevisia, nulla cupido etiam &
 certitudo de eadem iis concessa sit; unde itidem dictæ na-
 tiones cerevisiam fortè à suis doliis & cellis vinariis gravi in-
 dictâ poenâ proscripserunt, teste *Thom. Lansio in Consult. 1.
 pro German. p. 8.* Hinc laudatus autor etiam Italici perfectio-
 rem gustum mentemque saniolem precatur. Rectius sentit
 de cereali potu *Joh. Manardus lib. 5. Epistol. 2. f. 64. (& lib. 17.
 Epist. 5. f. 456.)* inquiens: alioqui licet & ratio & antiquo-
 rum autoritas reprobare eos potus videantur, qui ex granis
 constant, ceu aspectu, odore, gustu etiam insuetis, quod &
 mihi contigit, horribiles: experientia tamen docet, septen-
 trionales homines, qui nihil ferè aliud bibunt, quàm cerevi-
 siam, & pulcherrimos esse & saluberrimos & robustissimos.
 Convenit proinde etiam cum ratione monitum illud Galeni,
 quò innuit: neminem rectè scribere aliquid de natura locorū
 & diversitate victus posse, nisi ut ratione didicerit, sic expe-
 rimentis peregrinationeque comprobet. Melius itaque edo-
 cti nos de Numburgensis cerevisiæ facultatibus salubribus, si-
 lere vel suppressas illas finire minùs ratum duximus. Nota
 quoque nobis sunt loca non nimis longè à Numburgo di-
 stantia, quæ, nescimus propter quas causas vel odia parcius
 ad se cerevisiam illam advehi permittunt; quorum incolis ta-
 men propter melancholicos aliosque endemios affectus oppi-
 dò salubris eadem esset, si ipsis suppeteret largiùs admissa vel
 advecta. Præterea cum hanc cerevisiam apprimè commo-
 dam & salubrem censeamus literatis & politioris conditionis
 aut fortunæ hominibus, quibus imprimis non admodum fre-
 quens corporis motus est concessus, de eadem subsequens ju-
 dicium, inter alias causas, concepimus autoritate non suspe-
 ctâ sanisque rationibus nitentes. Hoc itaque ut cedat in
 DEI maximi gloriam, proximi commodum, & literatorum
 gratiam à nobis exoptatam, denique voyemus
 atque contendimus.

JUDICIUM DE CEREVISIA NUMBURGENSI.

§. 1.

Cerevisia per *συκκομή* Cervisia dicitur à Cerere, id est frugibus, præcipuè verò hordeo, tritico, avena &c. quæ eandem ingrediuntur juxta Philologorum, quorundam (non ineptam uti arbitramur) intentionem. Quòd verò partim ex Latino, partim ex Gallico sermone conflatum sit hoc vocabulum, cum Latini integræ illius vocis olim ignari fuerint, credimus laudato *Conringio* & *Scheffero* l. c. p. 232. Nos prolixitati jam parcentes non excurremus in alias dictæ vocis origines aut etymologiam, de qua si lubet videri potest *Ger. Joan. Vossius* in *Ety-molog.* f. 277. Sunt qui putant arvisia vina, ab arvo dicta, poni pro cerevisia à *Virgilio* *Ecclog.* 5. v. 5. ita canens:

Vina novum fundam calathis arvisia nectar.

Rectius autem *Cervisiam*, quàm *Cerevisiam* scribi vult *Mart. Schokius* de *cervisia* c. 1. p. 2. Solam hanc scriptionem etiam consignat *Jos. Laurentius* in *Amalthea onomastica* f. 127. Dici etiam vel poni *Cervisium* indicat *Ambr. Calepinus* in *dictionar.* f. m. 175.

§. 2. De Cerevisiæ synonymis non erimus prolixè solliciti: *Plinius* l. 22. c. 25. ex frugibus, ait, fiunt potus *Zythum* in *Ægypto*, *cælia* & *ceria* in *Hispania*, *cerevisia* & plura genera in *Gallia* aliisque provinciis. Vox *Beræ* etiam in usu est quibusdam, juxta *Remb. Dodonæum* in *histor. stirp. pempt.* 4. l. 1. c. 22. f. 495. Germanis dicitur *Bier* / & juxta *Saxonum*, pronunciationem *Beer* / à quo nomine aliarum nationum, quarundam nomina eundem potum exprimentia non multum recedunt, uti ex autoribus de cerevisia occupatis facile cuique patebit. Porro quod hujusmodi potum autores Græcis labiis exponant vel appellent *πύρον*, *βρύτον*, *ῥαβίν*, *ξύρον* ἢ *ξύρον*, *φύραν*, *φυνάδον* ἢ *φυνάδιον* ex laudati *Dodonæi* l. c. *Jac. Theodor. Tabernemontani* lib. 1. c. 20. f. 661. aliorumque autorum locis pluribus constat.

§. 3

§. 3. Non contenti sunt his vocibus alii, sed brevi descriptione etiam indicant cerevisiam ob varios respectus, scilicet ingredientia, effectus, colorem aut similia adjuncta. Sic *Schokius in tractatu citato* sæpe illum potum cerealem nuncupat. Hordeaceo potu exprimit eam *Joh. Barclajus in Icone animorum c. 5.* Triticeum potum vel cerevisiam, quampiam *Weiß-Bier* (ad differentiam magis nigricantis illius ex hordeo paratæ) crebrò etiam dici, non ignotum est. Inter alias appellationes, *septentrionalium nectar* quandoque audit cerevisia, quia eadem potio populis his loco vini interservit, uti vinum calidorum locorum potum magis constituit; atque ideò forte horum locorum populis illius imperitia & odium oritur. Minus propriè verò videtur cerevisia appellari potus iste ex arborum succis confectus, cujus mentio fit in *Actis Philos. Anglicanis Ann. 1669. p. 118. &c.*

§. 4. Non malè etiam cerevisia vini vicarius vel substitutus potus dicitur, quod Poëta quispiam intendit his vernaculæ verbis:

*Des Weines Substitut
Ist auch zuweilen gut.*

Sic olim propter vicariam hanc vini opem à cerevisia expectandam, illam οἶνον ἐκ κριθῆς vel κριθῶνον dictam fuisse, meminimus in *dissertat. de literatorum potu c. 2. §. 20.* de quo plura testimonia innotescunt ex *Dodonei l. c. Dan. Sennerti Institut. lib. 4. part. 1. c. 4. p. 858. &c. Conringii l. a. p. 232. Mart. Kergeri de fermentat. p. 219. Casp. Barthii l. 11. Adversar. c. 32. Casp. Hoffmanni instit. med. l. 5. c. 27. Joh. Anton. Lindenii sel. med. ex. 6. §. 9. & ex Beat. Guern. Rolsincii ord. & method. med. special. l. 2. §. 3. c. 77. p. 142. & lib. 14. §. 1. c. 25. p. 997.* Quibusdam in locis etiam cerevisia propter certas quaspiam sibi concessas operationes, conditiones, attributa, vel causas modò bona modò mala & ridicula nacta continet epitheta, de quibus *Tabor de jure cerevis. c. 1. §. 7. Schookius l. a. cap. 50. p. 424. &c. Besoldus in thesaur. pract. in voce Bierbrauen. Sim. Pauli in quadrip. Botan. p. 379.* alique plures autores evolvi possunt.

§. 5. Non malè aliàs cerevisiam describit *Helmontius* in *Imag. ferment. impregnant. massam semin.* §. 2. quòd sit fumen, liquamen aut consummatum jus granorum. Nobis autem placet sequenti modo illam paulò prolixius describere. *Cerevisia est potus ex frugibus precipuè, certâ ratione in polentam, redactis, atque additâ aquâ, & quidem modò sine, modò cum lupo salutaris aliisve rebus amaricantibus, intercedente coctione, fermentatione aliisque requisitis operationibus adhibitis paratus.*

§. 6. Nobis non est animus de cerevisia in genere differere, de qua nonnulli autores peculiare tractatus ediderunt; veluti nonnullorum eorundem in subsequentiis nos mentionem inferemus; alii plures de eadem & *Zytho* peculiari-ter itidem agentes, patebunt ex *Coringii l. c. Martini Lipenii Bibliothec. medica f. 89. & Joh. Ant. Lindenii de scriptis Medicis p. m. 674.* De origine *Zythi* & *cerevisiæ*, quæ scilicet loca natalia, autores vel inventores agnoscant, super sedem anxie inquirere, cum ex modò dictis scriptoribus abundè certiores reddi possint, qui volunt; quemadmodum nonnihil etiam de eodem *dissertatio nostra de literator. potu c. 2 §. 22.* suppeditat. Studium nostrum vero jam solum occupatum erit de *Numburgensi* cerevisia. Interim non admodum ignotam putamus urbem illam *Numburgum* dictam, quæ tribus milliaribus distat ab hac nostra vinifera *Musarumque* politissima sede, & quidem prope *Salam*, nec procul ab eo loco, ubi dictus fluvius absorbet flumen *Onstrudum*. Utrum verò urbs illa ad *Misniæ* vel *Thuringiæ* tractum rectius referenda sit, aut quam *Etymologiam* appellatio ipsius agnoscat: an scilicet *Naum* vel *Nauburgum*, *Neoburgum*, vel νεοπόρ *G* melius (de quo *Joh. Mich. Dilherrus tom. 1. dissert. Acad. 1. p. 7.*) dicatur à nova turri, arce, vel munito loco; aut an concinnè magis *Novemburgum*, à totidem montibus aut munitis locis, turribusve, quæ non nimis procul ab urbe hac sitæ olim numeratæ fuerunt; veluti quæpiam loca ejusmodi etiamnum hodiè vocem *Burg*/præfixo nomine vel epithetò

quo-

quoque gerunt, scilicet: *Schönburg/Altenburg/Freyburg &c.* horum inquam etymologiam & accuratam notitiam in præfenti non evolvemus; sed promittimus nobis de his & aliis laudatæ urbis certitudinem majorem ex desideratis *Chronicis Numburgensibus* maximè Reverendi Dⁿ. M. Job. Zaderi, Cathedralis Ecclesiæ Numburgensis Pastoris, (aliquando edendis, quæ in scriniis apud eundem inedita adhuc asservantur) atque interim litem hanc eidem aliisque peritis historicis dirimendam relinquimus. Inter alias dotes verò quibus natura benigna urbem illam instruxit, non est infima vel silentiò sepe lienda ea, quam in ipsius cerevisia salubri depositam deprehendimus.

§. 7. Quod attinet ingredientia dictæ cerevisiæ, continetur inter illa hordeum, nec adeo triticum, quod hordeo calidiores & vini magis æmulos effectus, uti & obstructions majores aliaque mala plura procurare videtur; præcipuè si cerevisia ex eo parata lupuli floribus destituta, & nimis spissa, nec aquâ multum diluta existat: sicuti dictorum reatum participem talismodi cerevisiam triticeam & Breihanum inprimis declararunt autores à nobis in *dissertat. de potu literatorum* c. 2. §. 21. allegati; & si placet præterea evolvi potest *Gothofr. Moebius in institution. Medic.* p. 521. Triticeam cerevisiam tristitiæ cognomine indigitari & viscidiorum obstructionum parentem generare &c. ait Beat. *Guern. Rolincius l. a.* & *Sennertus l. c. p. 859.* &c. Obstructiones parere illam docet etiam *Matth. Martini de morb. mesenterii.* De variis similibus & aliis malis cerevisiæ albæ conferatur, quoque *Franc. Oswald. Grembsius in arbor. integr. & ruinos. hom.* l. 3. c. 1. p. 464. Dulci huic cerevisiæ alteram paratam ex hordeo & lupulo pariter, uti autores alii, etiam præfert *Greg. Horstius in instit. med. juxta hujus operum tom. 1. p. 367.* Præterea autor hic ibidem in diætâ communi cerevisiam illam eligendam censet, quæ modicè nutrit, calefacit, aperit, urinam movet, & omni flatulentia destituitur. Monemus autem circa dicta attributa vel postulata, quòd si cerevisia alvum quoque mode-

moderate laxet, magnam bonitatis partem adimpleat; unde flatus non omnes ab eadem abesse possunt. Si enim in purgantibus quispiam reformidaret aut declinare vellet omnes flatus, iis nunquam uti deberet: siquidem dicta causa flatuum à purgantibus vix separari potest. Commune quoque fere attributum illud aliàs est cerevisiæ è frugibus confectæ, uti in schola Salernitana inter alia id etiam de cerevisia indicatur c. 46.

Provocat urinam, ventrem quoque mollit & inflat.

Virtus illa autem in vitium verti, & augeri potest iste effectus, si hordeum, hujus præparatio, aut aliæ operationes & requisita in cerevisiæ coctione non ritè habeant. Malè infimul comparata est cerevisia, quò propius ad vini qualitates & operationes accedit, nec secedit promptè cum alvi scybalis, horumque motum ex corpore promovet. Generosa autem cerevisia sitim non benè sedat, faciei ruborem ac pustulas, aliaque mala plura, metuenda aliàs à vino excitat, quæ in *dissert. de literator. potu* attigimus. Similes effectus potui cerevisiæ Hamburgensis largiori (licet eadem propter alias proprietates bonas laudetur) tribuit *Jac. Theod. Tabernæmontanus l. c. p. 662*. Sed rubor ejusmodi faciei non adeò à Numburgensi cereali potu metuendus, quàm ipsius medela potius expectanda est. Labem autem ejusmodi memoratam aliis in locis à simili cerevisia forti, vel vino, aliove potu spirituofo obviam subinde observamus.

§. 8. Indulgebimus parumper ipsius cerevisiæ præparationi: postquam verò hordeum maceratum fuit aquâ per biduum circiter, aquâ illâ demptâ hordeum in vase quopiam conservatur ulterius per biduum aut triduum, quousque ad fermentandum, crescendum aut progerminandum aptum reddatur; hinc istud in area quapiam coacervatum aliquandiu collocatur ac postea extenditur ad spithamæ altitudinem, usque dum germinare quadantenus incipiat; postea brasium vel maltum consequenter confit mediante ignis moderatò gradu, & quidem interpositò pannò fetaceò. Bra-

fimum verò hoc melioris conditionis existit, quàm illud, quod
 igne nimmum fuit tostum aut ustum, de cuius malis non nul-
 la habet *Iustus Stengelius in der berühmten Bier-Kunst* c. 1. Pra-
 terea plurimorum autorum testimonio non tantæ bonitatis
 credi ut maltum, quod ignem planè non fuit expertum, sed
 solum aëri vel Solis radiis expositum confectum fuit. Quod
 verò brasium hoc sine igne paratum sanitati minus conferat
 in potu vel cerevisia, colligere licet inter alios ex *Helmontio*
de victus regimine §. 23. *B. Rolsincio* l. c. p. 143. *Mœbio* l. a. p.
 520. & 521. *Sennerto instit. Med.* l. 4. part. 1. c. 4. p. 860.
 aliorumque autorum libris de cerevisia conscriptis. Mira-
 mur proinde *Joh. Rud. Glauberum* in oper. chymicor. continua-
 tione in particula: *Deutschlands Wohlfahrt* p. m. 363. quod
 ultimum hoc brasium, vel quod in furno pistorio tostum
 fuit, præstantius pronunciet illò à nobis laudatò, atque hoc
 pariter nobiscum pauci fortè pluribus de causis admiserint.
 Porro ex brasio illo (priùs agitato vel cylindro quadantenus
 quassato ut fibræ ab hordeo, quod germinavit priùs, sece-
 dant) molaris ope fit polenta more solitò leviter fracta,;
 hæc postea cum aqua calidia per trihorium antea cocta mi-
 scetur, & à servis vel operariis pluribus (peculiariter hisce
 operationibus destinatis, ac singulis annis juramentò repe-
 titò adstrictis) per horam probè contis movetur & agitur,
 ac deinde in vase tecto aliquandiu ista mistura adservatur,
 usque ad reliquam materiam recipiendam & operationes suf-
 ferendas. Posthæc alia aqua in aheno usitato capaci per
 duas ac dimidiam horas cocta affunditur itidem priori mi-
 sturæ, quæ iterum probè movetur, more antea memorato,
 ac deinde quies ipsi iterum conceditur, usque quo confi-
 deat crassa polentæ materia, ubi tunc superior quapiam por-
 tio, seu flos ab illo liquore demitur, atque binâ vice (priùs
 quidem per quinque ac postea per sesqui horam) cum lupulo
 exactè denuò coquitur. Atque sic peractâ eâ coctione li-
 quor lupulò conditus cum reliquo illo penitus à polenta &
 fecibus demendo miscetur invicem in alio capaci vase pecu-
 liari.

liari. Deinde nova aqua calida polentæ ac fœculentæ illi materiæ prius quadantenus exhaustæ affunditur, eaq; post motum aliqualem præmissum, & quietem postea admissam, detrahitur ac iterum per bihorium coquitur, nec non cum duobus illis prioribus antea junctis liquoribus miscetur; quâ ratione optimæ prior cerevisiæ præparatio, usque ad secundariæ coctionem posteriorem, absoluta est. Nonnulla de bonitate, parandi modô, atque constitutionibus vel legibus de Numburgensi Cerevisia occupatis prostant in *dissertatione Juridica de Braxatione Jenæ 1671. sub Præsidio Chr. Phil. Richterî edita à nostro Conterraneo Joh. Ad. Haynio.*

§. 9. Deinde pro dicto cereali liquore lupuli salictarii flores circa Numburgum atque in confinibus locis cultos recipiunt, nec ex remotis locis, scilicet Bohemia &c. sumptibus majoribus advectos; atque eos flores, si non erramus, commodos magis, & propter nostrorum locorum indolem, sanitati magis congruos credimus, quàm remotis in locis collectos. Hinc miramur, cur loca quædam Misniæ spernant sui lupuli inquilini flores; cum tamen auctâ illius quantitate vires ejusdem paulò debiliores suppleri possint, si quis amaritiam majorem expeteret, & conducibilem in diæta censeret. Communiter verò lupuli mediocris portio pro Numburgensi cerevisia recipitur; nec errant fortè Zythepsæ diutius coquentes lupulum, quô ipsô cruda & invisa ipsius amarities domatur, & dulcescit magis, nec tantas vires medicas retinet, quales alia subinde cerevisia continet; & quidem vel à nimia inquilini lupuli copia, vel Bohemico magis amaricante, vel si parcè nimis uterque coquatur. Solet itidem aliàs non rarò pro cerevisia, quæ diutius asservari per æstatem debet, vel major lupuli portio recipi, vel mitius ille coqui; ubi tamen coctionem sufficientem præferrem, licet major lupuli quantitas recipi deberet. Non sunt autem temendarum virium flores lupuli dictô modô cerealem potum instruentes; siquidem illi incidendi, referandi vel evacuandi, & à corruptione præservandi efficaciam imper-

tiunt cerevisiæ, unde evacuationes corporis variæ citius expectandæ, nec insignis facultas nutriendi ipsi accedit, uti quidem ex cerevisia dulci & crassa citius effectus ille emergit.

§. 10. *Conringius de habitu corpor. German. p. 79. § 107.* idem illud adstruit, quod lupuli usus in cerevisiæ præparatione accitus nutritionem destruat; utut hoc non diffiteamur de aliis cerevisiæ generibus, præcipuè si admodum amaricent, id tamen de cereali potu Numburgensium minùs dici potest: utpote qui moderatâ portione lupuli conditus existit, & coctione magnam amaritudinis partem deponit. Loquitur præterea in eadem cerevisia effectus de causa, quod tabes non admodum obvia observetur Numburgi; sed potius benè & moderatè nutriti, habituque corporis mediocri præditi inquilini plurimi deprehendantur. Imò recordamur illuc peregrinos graciles subinde devenisse ac municipales factos esse, eosque cerevisiam illam non averfantes, popas ac pinguem corporis habitum contraxisse. Cæterum in *dissertatione nostra de obesitate exsuperante p. 55.* exposuimus mentem nostram, quod corpulentia adiposæ atque carnosæ multum conferat mitis potus, vel cerevisiæ largior usus. Innuimus in *eadem dissertatione* quod juxta quorundam sententiam panis cerevisiâ madidus crebrò assumptus pinguetudini comparandæ conferre credatur. Atque hoc non diffidimus expectatum iri citius à pane Numburgensi cerevisiâ ebrio. Præterea lactantibus mulieribus perbenè congruit illa cerevisia pro lactis uberi proventu, si in jussulis paulò frequentius aut largius assumatur: veluti hunc effectum citum & copiosum cerevisiæ omni in genere *Melch. Sebizius (de aliment. facult. l. 5. c. 3. p. 1150.)* recenti verò tribuit *Jac. Theodorus l. c. f. 464.* Quo in loco autor simul vini generosi ac sulphurati usum propè Rhenum nutricibus ac lactentibus infantibus admodum noxium statuit.

§. II. *Mart. Schoockius de cerevis. c. 41. p. 368.* arbitratur à recenti cerevisia inprimis pinguedinem contrahi, quòd per Belgium non obscure observetur, fidemque hujus faciant Zythepfæ, caupones, horumque uxores plerumque, præpingues, ventricosæ & aqualiculô deformes. Forsitan iidem etiam, uti credibile, primitias obsoniorum, aut ciborum flores crebrò carpunt ac delibant, veluti infimul inter eos communiter bonam offam non malus vel parcus haustus excipit vel sequitur. Dum itaque hi potui ac cibo simul indulgent, & assvescunt, forsan ideò etiam iisdem moles corporis non coactè accedit: constat quippe quod illi præguſtent sæpe cibos & hospitem mensæ accumbentium confortio, vel inviti subinde, interesse iisque propinare atque commendare suum potum cibosque soleant, unde postea non difficulter obesitatem illi contrahunt. Videtur tamen etiam reliqua cerevisia, etsi non sit recens, crebrius ac liberior ingesta obesitati inservire, modo non illa lupuli quantitate excedente admodum amaricet, uti ex jam dictis & adhuc dicendis dispalescit. De eodem, & quòd amara aliàs non ita promptè inserviant nutritioni, egimus in *dissertat. de obesitate exsuperante p. 51. &c.* Sic *Hieron. Mercurialis in prælection. Bononiens. f. 426.* alii, inquit, plus potus egent, quàm cibi: à quo magis pinguescunt. Non multum recedit ab hac opinione *Roderic. Fonseca de sanitat. tuend. c. 12.* nihil boni, ait, habet cerevisia, nisi quod pingues reddat ejus potatores. Forsitan etiam Bacchus aliàs non frustra popâ prominente pingitur, licet non à mero ita prompte, ac ab hordaceo vino seu cerevisia oriatur obesitas, uti in *dissertatione nostra de eadem conscripta* itidem indicavimus; in quam rem etiam adiſis nostram *disputationem de literatorum potu c. 2. §. 60.* Tacemus quòd Bacchi notus prominens ac turgidus venter potatoribus immodicis hydropicorum monstruosum habitum minetur ac præmonſtret.

§. 12. Quoad amarorem verò, medium locum occupat Numburgensis inter Misniæ cerevisias aliquot magis usitata

fitates ac celebres, scilicet inter Wurtzensen & Eilenburgensem aut Torgaviensem; non enim nostra ita lupulô condita amaricat ac postrema duæ, magis tamen saporem lupuli refert quàm prior, & quidem ideo, ac propter reliquam suam conditionem admodum temperata est dicta cerevisia: namque ordinarius & moderatus illius potus ac usus non turbat spiritus, nec in nutritione, uti dictum, temnendarum est virium. De postrema illa nutriendi potestate paulò post laus uberior innotescet ex *Jonstoni* idea aliisq; autoribus. Dicto nutritionis negotio in cereali potu Numburgensium non obstat etiam gemina illa vis evacuans isti indita, & adeo decantata, scilicet diuretica atque laxans alvum; de qua subsequenti in hac nostra dissertatione plura pariter indicabunt. Præter adductam experientiam de nutriendi facultate Numburgensi cerevisiæ concessa, nolumus quoque reticere encomium & testimonium *Job. Placotomi de cerevisia* p. 88. *Neoburgensis cerevisia*, inquit, *in Thuringia celebratissima est, neque immeritò. Nam multum substantiæ habet, benè coquit, multum nutrit, calorem geminum auget, & nulla re, quæ ad bonæ cerevisiæ conditiones requiritur, caret.* Allegat hunc locum etiam de cerevisia Numburgensi *Petr. Albinus in commentar. Chronic. Misnens.* p. 636. atque eam inter laudabiles cerevisias *Misniæ* refert. Non reticet similes laudes autor *Curiosor. Medicor. pro tuenda valetudine* p. 77. Numburgensis, inquit, in Thuringia præclara habetur, efficax est, & potenter roborat. Reliqua verba oculorum caliginem illi imputatam, & paulò post examinandam, unà attingunt.

§. 13. Non est, ut quis etiam lupulum moderatè receptum ac decenter coctum in illa nostra atque alia cerevisia reformidet, veluti in præcedenti §. 9. & 10. diximus; non dissuadent itidem penitus nobis usum illius laudabilem testimonia quæpiam sinistra autorum in illum directæ, quæ potius de lupuli copia, coctione illius insufficienti, aliisque circumstantiis nos intelligimus vel interpretamur. In qua sententia nobis etiam suffragatur locus citatus *Conringii* p.

232. Sic constat ex *Camerarii Sylloge memorab. cent. 5. part. 90.* quod lupulo vis inducendi ebrietatem insit. Istam verò sententiam ab alio medico etiam conceptam, vel prolatam (quod lupulus cerevisiæ addatur, ut caput inde moveatur & voluntaria infania procuretur) impugnat *Schoockius l. a. cap. 11. p. 76. &c.* Quantumvis lupuli flores etiam vim quampiam pro laxanda alvo conferre vel largiri possint; frugibus tamen & aquæ inprimis in cerevisia Numburgensi efficacia sua dicta, & uberius exponenda tribuitur. Utrum lupuli foliis & floribus major vis purgandi accedat, si in ipsius solo circa radices hellebori aut tithymallorum copia crescat (veluti statuit *autor citatus l. a. p. 79.*) deliberent & experiantur curiosi. Cæterum de usu salubri lupuli modicè in cerevisiam recepti, & narcosi à quantitate ipsius exsuperante expectanda agit etiam *Sim. Pauli in quadrip. Botanic. p. 380.*

§. 14. Præterea inter cerevisiæ Numburgensis ingredientia præcipuum locum occupat aqua, veluti eadem aliorum naturalium & artificialium liquorum plurimam portionem constituit. Quòd alioquin cerevisiæ plurimæ bonitas potissima dependeat ab aqua, indicat *Job. Henr. Meibomius de cerevisia c. 27. §. 2.* Aquam, ait, si potus salubris esse debet, optimam oportet eligere, visu nempe, gustu & olfactu putam ac sinceram. Nisi enim ea talis sit, cerevisia ipsa, quæ nihil aliud est, quàm aqua frumenti & lupuli florum viribus imprægnata, malæ aquæ qualitates plurimas retinebit; nec omnes coctura aut fermentatio emendabit. Suffragari his etiam videtur *Sennertus de scorbuto c. 4. p. 43.* qui cerevisiam, juscula & alia ex insalubri aqua parata scorbuto ansam subministrare scribit. A modò dictis non dissentit *Jac. Theodor. Tabernæmontanus in herbar. l. 1. c. 20. f. 661. &c.* Porro citatus *Sennertus l. 4. part. 1. c. 4. p. 860.* hæc habet: Qui de natura alicujus cerevisiæ rectè judicare vult, inprimis aquæ, e qua coquitur, naturam diligenter æstimet. Hinc etiam, peculiares proprietates nonnullarum cerevisiarum procul dubio ortum habent, ad quam rem tamen nonnihil coquendi & pa-

& parandi modus facit. Abit non invitus in hanc sententiam (quòd scilicet coctione non tollantur infalubrium aquarum vitia) *Schoockius l. a. cap. 24. p. 242. &c.* Plura similia monita de hac re dedimus in *dissertat. de literat. potu c. 2. §. 16.*

§ 17.

§. 15. Paulò inferius inter cerevisiæ Numburgensis vires vel laudes audiemus, quòd à calculo tueatur eos, qui bibant illam, veluti hæc & aliæ efficaciz plures, inprimis aquæ illius loci ab autoribus assignatur. Similem aliàs potestatem solvendi calculum inesse aquæ, quæ in specu Baumaniana scaturit, refert *Henr. Eckstormius de terræ motu p. 220.* Hujusmodi & aliis præconiis autorum minimè destituitur, aqua Numburgi obvia; quam omninò cum aère fraterno nexu (uti aliàs communiter ferè, ita & ibidem) sibi invicem juncto multum in illius loci salubrem conditionem suppeditare persuasum nobis habemus. Inter alia verò aquæ dictæ attributa, eandem vi laxandi alvum præditam esse, constat | autore *Gotthofr. Mæbio in instit. Med. p. 512. § 521.* Omnis autem aqua pro cerevisiæ Numburgensis basi ex puteis perennibus hauritur. Volunt quidam equidem, quòd putei quipiam in urbe illa contenti majori vi laxandi sint, præditi, quàm alii; de quo tamen nihil certi nobis innotuit, vix autem magnum discrimen inter eosdem intercedere credimus. De aliorum locorum verò diversis aquis vel puteis fidem faciunt autorum varia testimonia. Sic Brunopolino tam illam cerevisiam, Mumiam dictam, non nisi in certis quibusdam officinis cerevisiariis coqui ac parari posse fide digni annotant autores; idque fontium diversam rationem arguit. Interim non est dubium, quin præter insitam facultatem laxantem, major quadantenus facultas eadem in alia cerevisia quandoque, quàm in alia Numburgensi appareat; prout ingredientia, coctio, fermentatio vel alia adminicula ad illam operationem promptiora interdum accedunt; sic pro hominum diversa conditione, uti in purgantibus aliàs innotescit, alter alterò etiam citius alvum laxam ab eadem contrahet.

§. 16. Insuper tamen illud quoque verum est, quod non alio in loco Numburgensem cerevisiam sistere vel amulari valuerint; etiam si braxatores ex eadem urbe, parem coquendi modum & ingredientia adhibuerint; & uti quidam innuunt, vel aquam etiam Numburgo ad alia loca pro eadem conficienda devexerint. *Justus Stengelius* in *der bewehrten Bier-Kunst* c. 1. inter alia de cerevisia statuit quinque attributa requiri ad bonam quampiam cerevisiam: scilicet bonum lupulum, polentam minus taxandam, aquam vitiō vel culpa carentem, cœlum & aërem benignum, ac tandem Zytheψam peritum ac attentum. Idem autor ibidem etiam, concludit, quod non solum ratione loci sed etiam aëris & aquæ præcipuè tot ac tam diversæ cerevisiæ species passim coquantur: unde etiam Numburgi Torgaviensem, aut Torgaviæ Numburgensem cerevisiam coqui non potuisse perhibet. Quod an utrovis in loco tentatum sit ignoramus; non tamen de utroque irritō successu dubitamus. Idem hoc de aliis cerevisiæ speciebus alios autores etiam conqueri vel annotare, intelligimus ex eorundem lectione; dum pariter loca certa aliarum urbium cerevisiam parare ac sistere non valuerunt. Sic Lipsiæ non potuisse itidē Torgaviensem cerevisiam coqui ex aqua istius loci illuc devecta, scriptum deprehendimus apud *Cass. Hoffmannum de medic. officin. cap. ultimo p. 555*. Sic Hannoveræ non potuisse Zytheψam Hamburgensium cerevisiam coquere annotat *Mœbius in institut. Med. p. 520*. Ex his itaque partim colligere licet DEI mirifica opera, dum non omnia loca ex omni parte beata voluit esse, sed adeo distinctis dotibus ac conditionibus instruxit, nec non, modò huic loco bonum hoc indulgit, modò alii aliud, vel eidem denegavit; quò fortè inter alias causas commerciā & societas hominum eò melius conservaretur, de qua materia alio in loco plura in posterum cum DEO daturi sumus. Utrum a in eo negotio cerevisiam concernente suspicari liceat, quò vecturā illā aliis in locis aqua inepta fuerit reddita, vel reperta, pro cerevisia expetita, inquirant curiosi. Quòd vero

verò vecturâ cerevisia & alii liquores quadantenus immutentur, paulò post innotescet. | Suspicamur interim ferme, quòd aër nonnihil etiam conferat in locis quibusdam pro cerevisiæ varietate; siquidem aërem pro variis tincturis pannorum aut linteorum, quàm aquam, in locis quibusdam efficacem magis existere ex mente *Rhynii* refert *Exc. DN. Joh. Bohnius de aëris influxu p. 70.* Quæ leviter jam saltem attacta curiosorum, accuratiori indagatione digna censemus. Plura de locis non omnibus aptis ad cerevisiam quampiam desideratam, uti & de irregularitate ac diversitate potus cerealis sæpe eodem in loco & ex iisdem ingredientibus, diversis solum in officinis existentibus aut parati disquirat etiam *Schoockius l. d. cap. 10. p. 93. &c.*

§. 17. Paulò superius §. 8. indicavimus operosam cerevisiæ Numburgensis coctionem, quæ etiam ideò, tanquam consona veritati, adeò & meritò ab autoribus variis commendatur. *Jac. Primerosius de vulg. error. in Med. l. 3. c. 1.* taxat Zythepfarum communem ferè errorem, quòd cerevisiam non satis diu decoquant, præcipuè si aqua impura ad illam sumatur. Sic inter bonæ & ad usum commodæ cerevisiæ notas aliàs illud attingit *Schola Salernitana c. 16. p. 145.* inculcans hæc:

Non acidum sapiat cerevisia sit benè clara,

Ex granis sit cocta bonis satis, ac veterata.

Quem in locum, si volupe est, etiam commentatores evolvi possunt. Non immeritò autem sufficiens coctio pro bona cerevisia injungitur: hac ratione quippe cruditas ingredientium mitigatur, ne postea sylvestres qualitates & rigidas noxiasve operationes cerevisia nanciscatur, & exserat postmodum in usu. A coctione operosa Numburgensis cerealis potio fortè etiam non ita clara ac pellucida existit, uti alia varia cerevisia, cum nigra vel fusca obscurive coloris eadem potius appareat. Sic etiam colorem cerevisiæ inditum aliàs non à frumento & lupulo solum, sed etiam à coctura dependere arbitratur *Melch. Sebizius de aliment. facult. l. 4. c. 3. p. 1153.* Vitiò cruditatis verò non rarò laborant

rant cerevisiæ paganæ, quæ parum & perfunctoriè coctæ, flatibus ac fermentationibus minus aptis vel salubribus postea ansam præbent: inde enim tormina, nausea ventriculi, stranguria & similia mala oriuntur. Quomodo stranguria à cerevisia novella excitetur, docet *Helmontius de Lithiasi* c. 4. §. 29. Utrum ipsa verò ab acida causa oriatur, quadantenus ambigimus. Numburgensis cerevisia inter suas facultates laudabiles laxantem operationem non adeò coctionis insufficientis vitiò, quam virtute ingredientis aquæ, aëris, locique conditione sortitur, ac postea depromit. Deinde pagana cerevisia plurima, quia coctione abundanti destituta est, conservationi commodæ ac diuturnæ reluctatur. Præterea quoniam illa etiam omni ferè anni tempore, scilicet in vere, ubivis coquitur ac paratur, hinc corruptioni & acori citius obnoxia & omnium sanitati non ita congrua est; uti in colica suspectam illam censeamus infra §. 55.

§. 18. Numburgi autem Zypothœi in autumno, hyeme & initio veris coctionem solum peragunt hordeacei sui potus, videlicet præsentè frigidiorè statu aëris & aquæ, idque publicâ lege atque consuetudine ita ferente (dum circa Michaëlis festum illud suum opus incipiunt, & usque ad diem viridum modò continuant) reliquò tempore calidiori in dicto negotio feriantes. Optimam aliòquin cerevisiam coqui in Martio mense plurimi credunt ac docent autores; quod quidem respectu subsequētis temporis calidioris, quò aqua, aër & operatio ineptior est ad cerevisiam bonam ac diu durabilem, non admodum experientiæ refragari videtur. Sic *Joh. Mich. Schrimmerus in curiositat. phys. diff. 10. §. 25. p. 173. &c.* dictò Martii tempore aquam maturam & aptissimam censet. *Joh. Rud. Camerarius in memorab. Medic. cent. 9. part. 76.* expendit hæc: cur aqua in Martio collecta durabilior sit, & conferat pleuritidi atque oculis. In Martio autem meliorem, quàm alio tempore coqui cerevisiam videtur quadantenus negare. *Excell. Pancr. Bruno in Lexic. Castelli renovato p. 274.* Cui sententiæ etiam favet *Schoockius l. a. cap. 24. p. 245. &c.* De-

inepto tempore calido ad cerealis potus coctionem testatur præter experientiam eorum quoque autorum assertum, qui docent Septentrionalium vel frigidiorum regionum incolas meliorem cerevisiam sistere, quam calidorum locorum. Cæterum non destituunt Numburgensem liquorem Cereris etiam operosa mistio, fermentatio & cætera requisita; veluti plures bajuli & operarii ad cerevisiæ magnam quantitatem, (quæ simul illic unica coctione confit) requisiti, singulisque officinis cerevisiariis, quoad varia sua officia adsciti testantur. Imò magistri atque ministri vel servi cerevisiario operi destinati quovis annò jurejurandò quopiam ad fidelem suâ administrationem obligantur, de quo loquitur *dissertatio allegata de braxatione c. 6. §. 6.* Si quis verò in genere plura de fermentatione cerevisiæ ritè instituenda rescire appetit, auctores de cerevisia agentes adeat, quibus jungi possunt, *Mart. Kergerus de fermentat. p. 125. Matth. Tillingius de ferment. p. 121. &c. Thom. Willisius de ferment. c. 7. p. m. 25. &c.* aliique plures idem hoc argumentum ventilantes.

§. 19. Vix etiam aliis in locis, uti modò diximus, tanta cerevisiæ copia simul unicâ operatione vel coctione in officinis cerevisiariis excoquitur quam Numburgi; quamvis etiam paucos ante annos cœperint dimidiam portionem cerevisiarii operis (halbe Gebrâue) ibidem admittere atque coquere. A termino paulò ante dicto usq; ad Michaëlis festum cōmuniter suspenditur coctio, quousq; plurima cerevisia asservata consumpta, vel corrupta aut usui inepta est residua. Ultra dimidium annum autem, citra acidum saporem vel corruptionem, vix etiam asservatur eadem cerealis potio. Singularis itaque est conditio Gedanensis cerevisiæ, quam aliquando sexaginta annos superantem, & medico usui, quam siti sedandæ, aptiorem se reperisse asseverat *Phil. Cluverius l. 1. Antiqu. German. c. 17.* Verùm ejusmodi cereales potus, qui nimis spissi & spirituosi à frugibus & coctione existunt, nec aqua intercedente sufficienti conditiones legitimi potus expleant, varia mala sæpe inferunt sanitati; etiamsi diutius asser-

vari iidem, aut pro navigiis commodiores eò modò reddi possint, quàm qui diluti magis sunt : de qua materia in *dissertatione nostra de literatorum potu* c. 2. §. 19. &c. & paulò post hæc plenius agitur. Quò plus lymphæ verò aliàs excipit cerevisia, eò minus lymphatos, mentem turbatam, aut ebrietatem causatur. Medium locum itaque occupat inter generosum & nimis segnem potum vel aquam cerevisia Numburgensis, quæ non est degener illius proles, nec hujus nata; atque ideò bonum ac salubrem, nec non eruditis ac lautioris conditionis hominibus aptum potum constituit; uti in dictæ *nostræ dissertationis* §. 20. &c. pariter subinnuimus, atque potum similem personis modò memoratis commendavimus. Attacta verò cerevisiæ copia simul parata, & efficacia non omnis ipsi subtracta loquitur subinde de sinistro effectu: quatenus eadem recens vel modò cocta in cellis clausis recondita fermentando adeò vaporibus subinde replevit ista loca, ut ii hominibus appropinquantibus ac commorantibus ibidem, aliquandiu respirationem suffurati, & ab iisdem quipiam homines penitus suffocati sint; non aliter atque à musto interdum tragicus ejusmodi eventus innotescit.

§. 20. Mos varius etiam in diversis locis obtinet ratione convasandæ cerevisiæ, dum scil. quidam illam statim post coctionem absolutam calentem adhuc infundunt doliis, uti fit Numburgi; aliis in locis verò fermentationem aliqualem cerevisiæ expectant, usque dum candelam accensam halitus istius non sinant ardere, quod in Dania usitatum dicit *Sim. Pauli in quadripart. Botan. p. 405.* Aliis in locis majorem fermentationem absolutam semper, vel subinde in cerevisia expectant, antequam indunt illam vasis; atque hanc diutius durare nec sponte & adeò subito postea, nisi arte, ad fermentationem aut corruptionem redigi volunt. Porro cerevisia Numburgensis in doliis ritè picatis asservatur; nec magnâ capitis noxa ideò ab eadem metuenda est, nisi picis fumi magna quantitas in cadis aliquoties destinatò consiliò includatur. Picatas verò cerevisias aliàs dicti treatus accusat *Pla-*

cotamus de cerevisiis. Audiamus infimul etiam de hac re, sententiam nostri quondam Æsculapii Salani, scilicet B. Rol-
fincii in ordin. & method. Medic. special. l. 2. sect. 3. c. 67. p. 143. In-
picatis doliis, inquit, adservata cerevisia, ut Numburgensis &
Jenensis, à multis damnantur noxæ, sed fulgura hæc censura
sunt expelvi. Præterea potus dictus cerealis in cellis vel antris
profundis (ab aëre, calore & aquæ affluxu munitis) com-
modius ac diutius à corruptione immunis conservatur; imò
esculenta, potulenta atque humida alia varia, putrescentia
item seu vapores & effluvia spargentia non benè pro-
pè Numburgensem atque aliam quamcunque cerevisiam as-
servantur; si quis hanc integram & à corruptione liberam
diutius recondere appetit.

§. 21. Notari infimul hoc meretur, si experientia com-
probet sequentia asserta, ne scilicet fragrantia ad cerevisiæ re-
ceptacula adferantur, vel in illis asserventur. Sic Hagecius de
cerevisia c. 12. p. 45. scribit: quod cerevisia triticea admo-
dum aversetur rosarum præsentiam eaque corrumpatur, si
quocunque modò ad istam rosæ propius in cella admovean-
tur; de eodem vide sis etiam G. Morbosum de transmutation.
metall. p. 99. Monent alii menstruatas quoque fœminas à
cerevisia arcendas esse, cùm observasse velint ab illarum
anhelitu istam levi momentò acorem contraxisse; de quo
Mart. Schoockius l. a. c. 48. p. 404. & Isaac. Schoockius in cen-
tur. problem. rar. histor. phys. med. 15. p. 14. Annotat etiam
Illustris nostræ Academiæ Nat. Curiosor. Præses Joh. Mich.
Febrius de Absinth. p. 163. &c. quod fulgura corrumpant,
facile cerevisiam, nisi profundius in cellis & cadis probè clau-
sis illa asservetur. Similiter, cur recens atq; calens adhuc cere-
visia facile corrumpatur, quando fulmen cadit, disquirat
Mart. Schoockius de cerevisia c. 38. p. 351. Deinde quòd etiam
cerevisia in doliis florente hordeò turbetur, & ex hordeo non
fiat malta, dum reliquum hordeum in campis floret, cum hu-
jus ratione addita traditur in Sylv. Rattray theatr. Sympathe-
tic. p. 137. Illud tamen veritati minùs consonum esse asserit
Schoo-

Schoockius de fermentat. c. 33. Interim calidô illo tempore propter calorem ad cellas citius admissum sulphureasque, particulas sive atomos activas vegetabilium vestibis adhærentes, vel halitus similes in conditoriis à respiratione aliove modô ortas, non est impossibile quin corruptionem cerevisiæ citius contrahat, uti ex fragrantibus antea attractis cerevisiam afficientibus non obscure postèrius hoc etiam colligi potest.

§. 22. Dehinc si cerevisiæ sponte spumam vel flores promit aut projicit extra orificium superius vasis vel dolii, matura eadem potuique apta censetur. Si verò non procedat ejusmodi character, aut si cerevisiâ dictô aliove modô non indicet suam maturitatem, ars adjuvat eandem, quatenus polenta contrita aliæve res fermentationem commodam excitantes in illam immittuntur; de qua re plurimi autores de cerevisiæ scribentes agunt, atque ideò consuli possunt. Notum quoque est, quòd pro meliori cerevisiæ integritate conservanda, doliorum orificia argilla vel lutô recenti, cui subinde sal permixtus est, obdurari soleant, ne aër promptè in illa recipiatur, unde aliàs corruptio citius metuenda est. Suadendus verò magis videtur eo pro negotio loco salis culinaris sal Alkali, cineres vulgares, vel clavellati, & alia ejusmodi plura; quæ cerevisiam à corruptione tueri vel corruptam illam emendare quadantenus pollent.

§. 23. Varia etiam talismodi media, quæ restituunt acidam cerevisiam, consignata prostant in autoribus cerevisiam describentibus ac ipsius attributa ventilantibus, quibus investigandis jam non immorabimur prolixè: sic degenerantem & acescentem illam corrigere quidam satagunt nuce moschatâ, centaureô minori, & radice caryophyllatæ, cujus, vel caryophyllorum oleum pro arcenda aciditate laudat *Paracelsus l. 3. de conservand. rer. natur.* Similiter quòd caryophyllis Zythum ex hordeo confectum præservetur, colligere licet ex *Sylv. Ratray l. c. p. 9.* Deinde urtica urens maxima (quæ aliàs in hæmorrhagiis adeò dilaudatur à multis) & frustum chaly-

bis

bis optimæ notæ, cerevisiæ injectum, illam ab intempestiva fermentatione æstatis tempore à tonitru metuenda tuetur, si credimus *Sim. Pauli in quadripart. Botan. p. 519*. Aliàs etiam Zingiber & bacca lauri pro conservanda cerevisia integra ipsi immittuntur. De cretæ eadem potestate vulgò non ignota, videantur *Joh. Crato in Epist. med. 130. f. 228. Joh. Andr. Graba de cervo p. 111*. aliique plures. De cinere & similibus alcalinis fixis eidem intentioni inservientibus supersedemus multa commemorare, quæ etiam non semper adeò insalubrem, quàm invisam reddunt cerevisiam iis, qui hujus correctionis gnari sunt. Interim negandum non est, quòd integra cerevisia, quæ non indiget correctione, illi præferenda non sit, quæ prius corrupta ac postea restituta vel renovata fuit. De cerevisia Numburgensi quoque constat, quòd non insignem aciditatem communiter contrahat, ut aceti loco (ceu reliquæ cerevisiæ plurimæ) inserviat. Hinc eadem etiam diutius quàm pagana vel urbana alia varia citra corruptionem asservari potest; nec propterea metuere illam opus habent, quibus acidum alias adeò est odio, & propterea potum varium in medicina vel diætâ proscribunt. Dictam illam absentiã aciditatis forsitan coctio larga inter alia vetat in ea cerevisia, siquidem *Melch. Sebizi de alim. facult. l. 4. c. 3. p. 1152*. de eodem testatur, quòd accuratè cocta cerevisia potentior sit, ac diutius duret: Aquæ enim humiditatem, quæ alterationi exposita sit & corruptioni aptissima, coctione perfectâ consumi ait. De adductis his adhuc moneo & addo, quòd corruptio, præter humidi copiam relictam ab insufficienti coctione, etiam à malti ac lupuli parca ignis aut coctionis experientia (quia isthæc alterationi ideò magis obnoxia sunt) oriri possit. Verùm Numburg. cerevisia, etiamsi aquâ abundat, ac destituta est ingredientium reliquorum uberi apparatu, attamen propter suam exactam coctionem & operationes admissas diutius incorrupta servari potest, quàm alia varia. Cæterùm cerevisiam conservari quoque in marinis itineribus à putredine ovis in vasa injectis, (quæ exceptò vitellò con-

consumi dicuntur in illis) intelligimus ex *Actis Philos. Anglic. Anni 1667. p. 158.* Liqueoris etiam mentionem facit laudatus *Morhofius l. a. p. 100.* cujus pauca gutta corruptam cerevisiam restituerint. Quibus lubet plura similia intelligere, adeant *Balth. Schnurrium in Kunst- und Wunder- Buche p. 128. &c.* Non temnenda etiam de eodem & aliis negotiis variis circa cerealem potum occupatis habet *Stengeliuſ l. a. & Knaustinus l. c. lib. 3. p. 63. &c.*

§. 24. Contingit idem illud alias Numburgensi, quod de aliis cerevisiae generibus quidam referunt, quod scilicet meliorem saporem saepe acquirat, si in alia loca transvehatur, idque sine dubio propter motum novamque fermentationem; quamvis etiam quandoque forsan deteriore conditionem aut saporem contrahat illa, quando bibulorum aurigarum vel anabaptistarum dolum dolia variâ arte referata experiuntur. Inquirat *Isaac. Schoockius in problem. hist. Med. 13. p. 13.* cur cerevisiam mare emendet vel cur alium saporem, eadem nanciscatur, si in alium locum vehatur. De eodem, & quod cerevisia ex Germania ad Aquilonares terras transferri possit, atque sapidior ac potentior reddatur marinis fluctibus, si ex lupulo fortissimo (qui hamulus dicatur) cocta sit, agit *Olaus Magnus lib. 13. Septentr. Histor. c. 32.* Deinde docet *Job. Rudolph. Glauberus l. a.* succum vel liquorem spissum magis solito alias, nec admodum dilutum conficere ex cerevisiae ingredientibus, qui navigiis magis aptus, nec corruptioni adeo obnoxius sit, cujus portio quæpiam postea quovis tempore aquâ affusâ facile in cerealem liquorem potabilem redigi possit; de quo experientia consuli potest.

§. 25. Perlustravimus hucusque præcipue cerevisiae Numburgensis materiam vel ingredientia, coquendi item modum, ac conservandi, & transvectæ tandem illius conditionem; restat proinde ut adhuc examinemus vituperia & elogia vel vires ejusdem. Mox verò autores quospiam sinistros effectus (præter tot tamen melius edoctorum alio-

rum experientiam) cerevisiæ illi affigere & affingere deprehendemus. Sic autem Nicol. Reusnerus in *Poëmat. part. 3. lib. 3. p. 286. § 287. ad Danielelem Eulebeccium* exponit vires illius (quos versus etiam citat *Adr. Beierus in Architecto Jenensi p. 308.*)

Scire Novembergi, Daniel vis munera Zythi?

Paucula si legis hæc carmina certus eris.

Calculus hinc cedit, cedit nodosa podagra:

Ægrifici ventris cedit & omne malum.

Lumina caligare facit, rorareque nares

Sanguine, cum manibus mox titubare pedes.

Crescit & inde venus, vires sumptura bibendo:

Crescit & hinc alvi mox cita profluvies.

Pocula quem Zythi faciunt citò currere sani,

Forsan & hinc lato corpore sanus abit.

§. 26. Sed bona verba quæso Domine Reusnere:

Parcius ista bono huic Zytho objicienda memento!

Sequuntur forsitan hunc autorem alii, qui cerevisiam illam pariter cœcitatatis incusant, sic enim *Job. Jonstonus in Idea Med. pract. p. m. 40.* (aut in denuò edita eadem sub titulo *Syn- tagmatis universæ medicinae p. 128*) hæc habet: Cerevisia Neoburgensis in Thuringia; quæ benè excoquitur & nutrit; nimium si bibatur, caliginem oculis inducit, quidam à nimio ejus potu cœci evasere. *Bald. Timæus post responsa Medic. p. 163.* hæc de eadem depromit verba: Numburgensis cerevisia Erfurtenfi præstantior & salubrior est, à nonnullis tamen lædere visum, nec rarò cœcitatem inferre dicitur. Inter virtutes quaspiam illius cerevisiæ recensitas similiter vituperium modò dictum attingit *Jac. Theodorus (Tabernaemontanus vulgò dictus) in herbar. l. 1. c. 20. f. 663.* Addit idem, autor ibidem, quod illa capitis etiam debilitatem excitet, atque ideo ille vitiò ejusmodi laborantibus dissuadet ipsius usum. Verum dubium est, an unquam dicti illi, alique auctores repetentes verba isthæc degustarint cerevisiam istam, vel solidam cognitionem & experientiam de ea habuerint.

Proin-

Proinde cæcus cæcum potius duxit in ejusmodi opinionem, de cæcitatis causa dependente ab ipsa cerevisia; veluti etiam *Timæus*, *Theodorus* aliique plures id rumori aut lectioni duntaxat tribuunt, nec sua aliave experienciâ constanti confirmare pollent aut audent. Enim verò illum cæcitatis finistrum effectum de cerevisia eadem minùs veritati consentaneum fuisse hætenus compertum meminit *Val. Andr. Moltenbroccius de Arthritide vaga Scorb. c. 12. p. 190.* Sublevat nos insimul ab aliquali apologia vel responsione, pro isto opprobrio vel reatu cerevisiæ nostræ affricto refutando, alioquin nececessaria *Joan. Placotomus de cerevisia p. 88.* Eam, inquit, occæcare potenter clamant, neque id mirum est, cum non tam oculis, quam mente capiantur, si immodicè & perinde ut jumenta aquas infundant. A cujus sententia non est alienus *Henr. Knaustinus Von der Göttl. Gabe der Philosophischen Kunst Bier zu brauen l. 3. p. 57.*

§. 27. Cui interea experiri placet, cur ebrii & furiosi res geminatè videant, certior reddetur à *Sennerto l. 1. prax. p. 900.* De ebriorum gemino visu objectorum visibilium constat etiam ex *Thom. Jordani de divino in morbis cap. 11. p. 48.* Illa autem oculorum, imo pedum, manuum aliorumque organorum & sensuum internorum ac externorum impotentia facilè à quocunque generosi potus nimio usu vel abusu proficiscitur, veluti fusiùs hoc demonstrare valeremus, si longiùs in his occupari aut hærare vellemus. Quis dubitabit præter hæc, jocò aliquando prolatam illam culpam, eamq; cerevisiæ illatam fuisse, quæ postea ab aliis seria atque vera reputata, propugnata & propagata indifferenter fuit: veluti de simili materia vel vocum ambigua interpretatione suo tempore plura in *scrutinio nostro amuletorum* suppeditabimus. Imò *Reusnerus* videtur ipsemet prodere quadantenus ambiguitatem sinistri effectus cerevisiæ imputati; quatenus manus ac pedes inde titubare ait. Ab ebrietate itaque hic effectus potius metuendus est, uti experientia de potu generoso alioquin id comprobatur. Statuit insimul citatus autor,

quòd dicta cerevisia citò currere faciat; item quòd cedat ab eadem nodosa podagra, artus alioquin ligans; uti & quod læto ac sano corpore abeat, qui illam bibit. Si quis conciliat illa dicta commoda dependentia ab usu legitimo, & incommoda ab immodico usu cerevisiæ, consignata, non obscure jocò quopiam prolata, aut certâ ratione accipienda esse eadem intelliget; veluti etiam oculorum & capitis mala, temporanea aliàs à potu generoso quocunque, vel qui vitiò quopiam peculiari laborat, oriri possunt; uti antea dictum, & adhuc dicetur in subsequentibus.

§. 28. Rarò autem à solo paulòque largiori potu cerevisiæ Numburgensis ebrietas, & hujus consequens effectus, scilicet balbuties, vertiginosa & imbecillis visio &c. oriuntur, uti quidem ab alio potu generoso citius isthæc fieri observamus; de quo ejusque ratione videri potest *Gregor. Horstius in operum tom. 3. f. 190.* Testantur quoq; non rarò nomina vel epithetha variæ cerevisiæ in quibusdam locis addita de effera illius efficacia, de qua autores à nobis allegati §. 5. sine videri possunt. Sic dictam volunt quidam cerevisiam Mumme quod mutos quasi faciat, & non aliam præter ejusmodi inarticulatam vocem eloqui sinat. *Mord und Todtschlag* à vi caput, turbante & inquietos reddente quipiam deducunt. *Knise-nack* quidam dici putant, quod cervicem frangat, vel in lapsus reddat pro nos. *Sim. Pauli in quadr. Bot. p. 380.* verò modò dictam cerevisiam Knesenack rectius scribi, & significare illud nomen vult idem ac Dominorum vel Magnatum cerevisiam. Pluria similia jam eruere vel adducere huc supersedemus. Utrum itaque communiter olim, vel interdum fortior cerevisia Numburgi, quàm hodie solet, exstiterit parata; aut an ista cum vino juncta ebrietatem cum aliis hujus Symptomatibus induxerit quibusdam; aut an sola eadem inebriaverit quempiam, qui potus tenuis etiam impatiens fuit, ignoramus. In *dissertatione nostra verò de literator. potu c. 1. §. 15.* indicavimus, quòd quidam etiam à folius aquæ potu ebrietatem abstulerint. Non immeritò porrò suspicio nobis

oritur de ambigua voce cœcitat̃is, quòd scilicet non eadem, perpetua sit intelligenda, quam quidam à cerevisia Numburgensi promanare volunt. Namque Germani dum insigniter inebriantem cerevisiam velebrios existentes describere solent, exprimunt illud vocibus *Stockblind* oder *blindvoll*. Ueberior hujus suspicionis ansa atque ambigua interpretatio Cerealis liquoris Numburgensis occœcantis, & caput turbantis aut debilitantis colligere licet ex verbis *Job. Coleri* (vulgi oraculo œconomico) *Hauß-Buche l. 2. fol. 22.* recensens autem ibi autor variam cerevisiam salubrem in Thuringia, & Misnia reperiri, subdit demum hæc in vernacula: *Sonderlich aber zu Nauburg / da man ihm (dem Biere) dann Gerstegnung / und recht gut Malk gibt / und mit Fleiß brauet; darunnehrt und wärmt es wohl / allein daß es sehr in Kopff steigt / wann man es zuviel trinckt / daß auch die Leut blindvoll darinnen werden.* Verum de illa cerevisia, quæ hodie communiter Numburgi prostat, nemo facile metuit magnam ebrietatem; unde potius ibidem & in confinibus locis in conviviiis pro declinanda crapula, à vino aliàs metuenda, Cereris ille liquor desideratur, & pro calore sitiquè mitiganda, à vino itidem oriunda, interponitur ipsius potui; vel etiam dictum in hunc scopum in fine conviviorum præcipuè illa bibitur: veluti hujus & mox memorandi fecimus pleniorẽ mentionem in *dissertat. de literator. potu c. 2. §. 90.* Similiter eadem cerevisia adeo expetitur propter mitem suam, minusque inebriantem naturam ab iis, qui nicotianæ usui noto indulgent; ne scilicet capitis molestia & imbecillitas, à dicto fumo aliàs metuenda augeatur, sed potius imminuatur & corrigatur. Proinde hæc recensita, quia veritati consona sunt, Numburgensium cerevisiam ab istiusmodi reatu liquido absolvunt, & commentum talismodi errore, imperitiâ, vel jocò ortum ac propagatum esse arguunt.

§. 29. Non impossib listandem foret ebrietas, vertigo & caligo oculorum, si fortè aliquando infelix lolium (juxta *Virgil. Bucol. Ecl. 5. v. 219. & Georg. lib. 1. v. 163.*) Ægylopem, sterilemve avenam (& quidem vel destinatò consiliò, aut cum,

hordeo illam collectam) quispiam admiscuerit cerevisiæ; uti à quibusdam illud subinde fieri solet, de quo *Mart. Schoockius l. a. cap. 9.* Non obscure autem istiusmodi mala oculis metuenda esse à lolii usu perhibent autores. Sic enim *Ovidius lib. 1. Fastor.*

Et careant loliis oculos vitiantibus agri.

Non alienus ab hac sententia videtur esse *Plautus in milit. glorios. 2.3.* inquiens: Mirum est, loliô victitare te, tam vili tritico. Quid jam? quia lusciosus es verbero. *Ædèpol* tu quidem cœcus, haud lusciosus. De lolii maleficio plura constabunt ex *Job. Schenckii observat. l. 7. fol. 880.* aliisque autoribus pluribus. Tacemus alia varia, quibus mediantibus interdum in locis quibusdam, quidam turpi lucro inhiantes, inebriandi potestatem, colorem, aliasque plures proprietates cerevisiæ inducunt vel conciliant: scilicet fuligine, semine hyoscyami, cocculis de Lephante, foliis salicis &c. quos ausus malitiosos ac perniciosos recenset, damnat & homicidio accenset *Jac. Theodor. Tabernæmontanus l. a. cap. 20. f. 659. &c.* Apud *Sim. Pauli in quadrip. Botan. p. 46.* mentio fit, quòd in Belgio, Dania aliisque in locis pluribus à Rusticis *Rhus myrtifolia* seu chamæleagnos cerevisiæ coquendæ addatur, ut tenuis dilutaque carius veneat; quippe quò aptior evadat ut ocius

Impediat gressus debilitetque pedes.

Eam etiam cerevisiam crapulâ discussâ enormes capitis dolores non assvetis gignere solere, dicit laudatus *Pauli.*

§. 30. Cæterum ex sacris etiam addiscimus, quòd inter alios affectus vel effectus malos, quos ebrietas, & abusus vini eructat in intemperantes, oculorum vitia & rubedo contineatur, de quo *Proverbior. c. 23. v. 30.* Ideoque, veluti in omni alia saluberrima re, sic etiam in potu.

Usus habet laudem, crimen abusus habet.

Verum licet norint maximè quidam bibuli oculorum aliarumve partium aut functionum læsionem à potu nimio se contracturos, reperias tamen inter eos, qui parum pensi illud habeant; quin potius cum illo statuant, quem delineant sequen-

quentes versus Poëta allegati apud Jac. Pontanum in Bellar.
Attic. p. 218.

Potando Medicus perituros dixit ocellos,

Fuseo : qui cum se consulisset ait.

Perdere dulcius est potando quàm ut mea servem

Eradenda pigris lumina vermiculis.

Benè infimul ebrietatis imaginem torvam inter alia velatis oculis depinxit quispiam, quam conditionem metricè exprimit Poëta annotatus apud eundem Pontanum l. c. p. 344.

Cur velati oculi? occæcat quia lumina mentis.

Alius locus in hanc rem quadrans occurrit etiam apud laudatum autorem p. 496. ubi ostenditur ebrios, ut amantes cœcutire. Sic de Lacedæmoniorum Symposiis Critias in Elegiis inter alia hæc depromit de potu nimio:

Invaditque oculos cœca caligine nubes,

Curas lethæo pocula more fugant.

§. 31. Sed ad Numburgensium liquorem Cereris revertimur, de quo nescimus, utrum fortè autores quipiam, propter ipsius vim laxantem & flatulentam oculis itidem infestum illum declararint; sicuti aliàs statuunt, quod flatulenta existant legumina, bulbi, olera & similia alia, ita eadem etiam oculis infesta declarant. A veritate v. planè alienā esse hanc culpam cerevisiæ Numburg. assignatam, facile quis experietur, modò loci illius atq; incolarū conditionis gnarus sit. Peregrini, item mercatores remotis ex locis nundinas ipsius urbis quovis annò, hæc scil. & subsequētib; septimanis visitantes, vel locum illū alias ob nundinas & mercaturam crebrò peragrantes, veritatis à nobis assertæ certiores facillè reddentur. Hinc verba Lansii, quæ in præfatione adduxim⁹ de Italici, nostra jam facimus, & iis, qui à veritate dissonum quid de illa cerevisia statuunt, perfectiorem gustum mentemque (addimus etiam experientiam) apprecamur. Nulla quippe cœcitas nec capitis debilitas aut turbæ, aliunde æquè advenientibus hominibus ac inquilinis, qui vegetæ aliàs ætatis ac valetudinis sunt, ibi à cerevisia oriuntur; nisi senium,

tan-

tandem (uti aliis in locis, ita & illic) oculorum & aliorum sensoriorum organorum usu eos inquietos sensim deprædatur. Demum si quis ebrietatem fortè contrahat ab eadem solâ, ut ideò neque pes, neque manus, caput, oculi aut alia organa suò officiò defungantur; temporanea sunt ejusmodi mala, & caligo oculorum imprimis, nec oculariò chirurgò ideò illa indigent, cum facilè transeant: quando scilicet ipsorum causa, videlicet crapula displosa est, scennò ac inedia admixta, vel vomitu præmixta. Non suspicamur itidem diuturnam ebrietatem & cæcitatem ab eadem oriri posse, cum ii, qui levi potandi habitu præditi sunt, eludant communiter omnem ebrietatem ab eadem metuendam. Interim constat etiam, quòd aliquando vel tres aut quatuor dies superans ebrietas in quibusdam hominibus à generoso potu oborta & observata sit, de quo *nostra dissertat. de literat. potu c. 2. §. 67.*

§. 32. Non extorquere etiam hoc, aliisque in locis pluribus degentibus juvenibus atque senibus, literis atque imperio summo vel magistratui addictis debemus testimonia, de dicta innocentia Cerealis liquoris Numburgensium; utpote qui à seculò & ultra huc usque eodem usi sunt, & etiamnum quotidie utuntur, atque sæpè abutuntur, nec tamen istam oculorum aut aliam sanitatis noxam inde deportant. Dubium potius non est, quin cerevisia hæc salubribus suis facultatibus toties laudatis & adhuc laudandis, vel memorandis catarrhorum materiam & hujus subsistendi ansam à nobilibus ad ignobiles partes, vi suâ geminâ aperiendi derivet, scilicet superfluum serum, ulterius illinc excernendum; adeò ut juxta 6. *Aph.* 17. 31. 46. &c. atque sect. 7. *Aph.* 29. oculorum malis quibusdam æquè illa blanda continuata alvi, & spontanea quasi subductio conducat, ac quidem alioquin arte concitata purgatio, quæ salutaris oculis observatur ac declaratur. Sic recordamur puellæ ophthalmiæ oculi dextri laborantis alio in loco, quæ huc devector hujus loci cerevisiâ, laxante itidem quadantenus, & dicta,

leni-

lenibusque purgantibus subinde interpositis liberata fuit ab eodem malo. Neutiquam verò patrociniatur his prolatis potui nimio naturæ inimico, quicumque etiam sit ille; cum æquè à cerevisia, & aqua, quam à vino nimio mala varia contrahi possint. Imò si intempestivè solum potus varius, bonus alioquin, & minus temperatè admittatur, noxius sæpè evadit; veluti multa de his *nostræ dissertationi de literatorum potu* inseruimus. Quod verò à salubris etiam cerevisiæ potui nimio in bibaces mala plurima redundare possint, inter alios autores benè inculcat *Jac. Theodorus in herbario l. a. f. 659.*

§. 33. Quemadmodum verò aliàs unda undam trudit, ita unus error multorum aliorum similium non rarò parens est; quod in *Reusneri* carmine non obscurè innotescit. Sicuti ex laxante & flatulenta facultate cerealis Numburgensium potus quispiam subsumere fortè nifus est oculorum hebetudinem: sic forsitan etiam ex eodem fonte venerem auctam alius quispiam deduxit, vel derivavit; flatulenta verò aliàs ad fuscitandum & augendum venerem apta statuuntur multorum suffragiò. Tandem equidem incolæ dictæ urbis non sunt steriles vel infœcundi, (ut adeò generationis negotio non reluctetur quidem cerevisia illa) non tamen admodum falaces existunt, vel æstrò veneris magis tentantur aut exagitantur, quàm aliorum locorum inquilini: veluti quidem talismodi loca dantur, quæ cerevisiam ejusmodi provenere fuscitanda potiolem possident, & nomen etiam quadantenus vulgari idiomate quopiam ideò gerunt. Sic *Servestanam* cerevisiam fœcundare, innotescit ex *Wendelini de admirandis Nili præfatione* § p. penultima. De *Finlandiæ* quoque potu *Cereali* scribunt, quòd mulieres fœcundas reddat ille, adeò ut istæ sæpè gemellorum matres inde fiant, attestante illud *Olaô Magnô Goth. histor. Gentis Septentrional. l. 13.* Nihil certi verò de cerevisia vel aqua Numburgensium nobis constat, quòd dicta ratione, aut forsitan ob nitrosam suam qualitatem eminentem vim venerem stimulandi aut fœcundandi largia-

cur; veluti quidem alia etiam aqua varia hanc ob efficaciam, deprædicatur. Quod Nilus fœcunditati multum conferat, non ex citato solum *Wendelino*, sed etiam ex aliis autoribus variis dispalescit. Nitrosæ autem facultati tribuunt aliàs illam Nili potestatem *Jul. Cæs. Baricellus in hort. Genial. p. 10.* & *Georg. Hornius in histor. natural. l. 4. c. 6. p. 222. 251. § 269.* Idem autor ibidem § lib. 2. c. 3. p. 89. etiam eandem aquam alvum laxare propter nitrosam qualitatem inditam scribit. Denique de Nili aqua fœcundante, & quòd econtrario *Tharra* aliæque plures aquæ sterilia reddant animalia juxta *Theophrastum*, certiores reddimur à *Mart. Schoockio de cerevisia c. 23. p. 225. &c.*

§ 34. Si verò hæctenus examinati duo effectus & subsequens deterior, quàm priores à cerevisia Numburgensi promanarent, procul dubio eidem magna, cita & prompta, vis inebriandi aut calefaciendi inesset, nec ideò ista adeò apta foret literis invigilantibus; quæ tamen iisdem oppidò congrua & salubris est. Illa namque mediocris vel temperatus potus existit, cujus largiorem quantitatem, pro corporis sui nutriendi atque humectandi indigentia eruditi citra noxam bibere possunt; veluti talismodi potum iis (si qualitatem, atque quantitatem decentem non excedat) congruum duximus atque diximus in *dissert. de literat. potu.* Narium autem hæmorrhagiam etiam excitare memoratam cerevisiam, pariter indicat *Reusnerus* in disticho tertio expresso §. 25. Cur verò illa ejusmodi sinistrum effectum promoveat, non, facile hariolor; cum experientia de eadem penitus fileat, æque ac de alia gemina ista culpa antea refutata, calidam potestatem itidem præsupponente. Ad aliqualem frigiditatem itaque potius inclinare videtur Cereris illud donum, uti nitrosa ipsius qualitas, & mediocris temperies, nec non experientia stipata autorum communi suffragiò comprobatur; de quo plura paulò post dicenda restant. Quòd vinum verò aliàs ad spiritus suscitandos, sanguinem movendum, & ex corpore emovendum vel hæmorrhagias promovendas aptissimum

fimum adminiculum fit, citra noſtram iteratam experien-
 tiam, aliis quoque notum eſſe remur. Ii quippe qui in hæ-
 morrhagias proni ſunt, à vini uſu facilè in eaſdem præcipi-
 tantur; inprimis ſi quis animi vel corporis varios motus an-
 te vel poſt dictum potum patiatur. De vini dicta vi hæmor-
 rhagias promovente aliquando in *difſertatione de mictione*
cruenta §. 38. egimus, quem locum huc tranſcribere ſuper-
 fedemus. Adſtipulantur præterea testimoniis illis *Mœbius*
in inſtitut. Med. p. 519. Pueris, inquiens, febricitantibus &
 juvenibus ſanguine calidiori præditis, facileque ſputo cruen-
 tō, hæmorrhagiis & phthiſi laborantibus, vinum non con-
 cedendum. Similiter quòd cereviſiæ potus longè ſalubrior,
 quàm vini ſit infantibus ac juvenibus, propter nutriendi ma-
 jorem ac meliorem facultatem ſtatuit, *Jac. Theodorus l. a. f. 660.*
 Sic poſt motum inſignem tripudiis peractum, à potu poten-
 ti vel vino generoſo aſſumpto, hæmorrhagiam profuſam,
 ſecutam eſſe annotavit *Bald. Timæus lib. 1. Caſ. med. 34. p. 67.*
 Plura teſtimonia de vino ſanguinis effuſionem adjuvante,
 trahi huc poſſunt ex *Galenì 6. Aph. Comm. 31. & Capiſacci*
l. 1. præſt. cap. 51. item lib. 2. præſt. cap. 6. Vini quoque po-
 teſtatem & vires, quæ ex ipſius uſu in ſanguinem redundant,
 benè ac diſertè exprimit *Remb. Dodonæus de vitis & vini hiſto-*
ria cap. 6. Et nos dum hanc diſſertationem conſcribimus,
 certos reddit amicus quiſpiam de juvene quodam vegeto
 literiſque litante, qui vix ante dimidium annum noſtram ur-
 bem vel locum hunc eruditis viris ac vitibus feracem deſe-
 rens Argentoratum conceſſit, atque illic ob cereviſiæ gratæ
 ſibiſque congruæ defectum, à vini largiori vel continuato u-
 ſu inſignem in hæmorrhagiam vitæque dubium ſtatum ante
 aliquot menſes incidit. Iſthæc & ſimilia verò ſanguinem
 magis, quàm cor ſanguificare, inter alia non obſcurè com-
 probant. Eò citiùs quoque juvenes vel ad pubertatem acce-
 dentes (quos aliàs ſanguinis fluxionibus è naribus obnoxios
 etiam pronunciat *Hippocrates 3. Aph. 27.*) experientur hæ-
 morrhagiam iſtam, ſi inter potum illum intercedant animi &

corporis motus: veluti de his, merique usu profuso, vel continuato diætæ literatorum minus congruo, prolixè egimus in *dissert. de literat. potu* c. 2. §. 36.

§. 36. Præter hæmorrhagias varias, quæ nobis innotuerunt à vino ortæ, aliquoties etiam à vini, Franconici imprimis, largiori vel continuato usu quiescentem palpitationem cordis gliscere observavimus; cui infelici vini effectui promptius adminiculum subministrarunt altercatio, vel alii sinistri affectus animi. Atque ita quidem ab acrimonia & concitato motu sanguinis inducto vel adaucto ex dicto vini potu, citius quam à cordis culpa malum illud induci suspicamur; etiamsi polypus, aliaque corpora subinde post mortem, dicto affectu defunctorum, in corde reperta fuerint. Quomodo merum juxta mentem *Hippocratis* efficiat palpitationem venarum, enarrat *Hier. Mercurialis in prælection. Bononiens. f. 436. &c.* Sic inter varios noxiæ atque turpis ebrietatis effectus etiam cordis palpitationem recenset *Mart. Schoockius l. a. c. 17. p. 166.* Quod heluones itidem experiantur affectum istum, attestatur quoque *Helmontius.* Annotabit insimul curiosus lector anatomicas observationes de ejusmodi defunctis evolvens, quod in illis sæpe corda magna atque patula reperta fuerint; cujus causam subministrare autumamus acrimoniam sanguinis & præcipitem, illius ad cor tendentem aut concitatum motum atque pulsum; eâ quippe ratione cor velliicatur, infarcitur, roreque purpureo ista amplitudo conciliatur.

§. 37. Exempla istiusmodi magni atque ampli cordis, post obitum in corporibus defunctis deprehensi, quibus scilicet cordis palpitatio in vita molesta fuit, suppeditant *Excell. Christ. Garmannus, collega noster honoratissim^o, de miraculis mort. p. 70. Miscellan. Acad. natur. curios. decad. 1. Anni 1. obs. 70. p. 171. & Theoph. Bonetus in Anatom. pract.* Forsitan nostrum horum locorum vinum hæctenus dictis malis excitandis non adeo facile inservit, quàm vina sulphureo-salinâ qualitate magis prædita; de quorum postremorum conditione, & ma-

his variis, ab iis procedentibus, nonnulla dedimus in *differt. de literat. potu. c. 2. §. 1. &c.* Atque ideo credimus etiam palpitatiōi cordis ansam præbere aromatica juxta *Mœbium in Institut. Med. p. 157. & Excell. Paul. Ammanum in Paranes. ad discent. p. 171.* Forsitan autem vina nostra propter acidam suam evolutam aut apertam magis, atque ideo diureticam, efficaciam, non ita in vasis stagnant, tartari concretionem & obstructions moliuntur, & consequenter alia mala sanguini inprimis atque postea variis partibus inde nutriendis adferunt. Nihil in præsentī addemus de sanguine serove acriscorbutico, melancholico, & sine dubio alkalino vel muriatīco magis quam acido, (cui viscida materia subinde conjuncta est) tanquam causa vel adminiculo potiori in palpitatiōe cordis accusando.

§. 38. Quod verò palpitatio ejusmodi imminuta fuerit urinæ excretionē, evulgat ex *Cratone Schenckius l.c. p. 68.* Cur itaque in his aliisque feri acris affectibus non commendemus cerevisiam Numburgensem, (salubrem propter geminam suam evacuandi, aliasque plures egregias facultates) nihil prohibet. Nulli quoque dubitamus, quin eadem cerealis potio præservationis gratia in ejusmodi malis multum præstet; si ordinario usui in diætā destinetur. Placet nobis in hanc materiam laus & locus de aquæ usu commodo, qui prostat apud *Balth. Pisanellum de esculentor. & potulentor. facultat. ab Arnold. Freitagio in Latinam convers. p. 158. & 159.* Omni, ait, ætati aqua convenit, idque peculiare præ vino obtinet, quò nomine majori, quàm vinum est usui, uti & melancholiæ ab adustis humoribus genitæ, ac cordis palpitatiōi. Sed de malis ejusmodi à sero dependentibus aliquando cum DEO commentarium peculiarem ad *Caroli Pisonis* elegantem, ac utilem tractatum de morbis à colluvie serosa oriundis sistemus; quemadmodum etiam suo tempore dispiciemus an famosiladeo ardelionis vel *Styxargendæ* officium subeat acidum in morbis variis, nec locum in curatione varia promptè inveniāt; ceu istud hæctenus multorum suffragio reputatum

& condemnatum fuit. Denique cur palpitazione cordis laborantes haud facile inebrientur, adi & audi sis *Wolffg. Hæserum in Herc. Medico p. m. 209.* & *Christ. Langium in Miscellan. curios. p. 39.*

§. 39. Cum itaque hæmagogon existat vinum ex antea dilucidatis, aliisque fundamentis pluribus, miramur historiam à *Petr. Borello in obs. Med. cent. 2. obs. 87.* consignatam, dum abstemius quispiam crebrâ hæmorrhagia laborasse dicitur, qui curatus postea sit vinô moderatè sumptô. Non autem arbitramur aliis idem hoc, & præcipuè à largiori potu vini, contra hæmorrhagias bene successurum. Interim nemo facile inficiabitur, quòd in Medicina etiam subinde monstra aut miracula, captum nostrum & communem cursum, vel regulam transcendunt fiant; juxta *Averroëm l. 7. collect. c. 2. Hippocratem item & Celsum.* Cujus asserti uberius etiam fides haurietur ex *Joh. Bapt. Sironi Jatrofophia p. 118. 120. &c.* *Georg. Petr. Pierii dissertat. de fratre Lombardorum p. 5.* *Hier. Mercurialis consultat. 53. lib. 2.* *Hier. Jordani de divino in morbis p. 17.* *Thom. Bartholini in oration. 1. p. 1. &c.* aliorumque plurium autorum scriptis. Opus præterea esse videtur, ut conemur cerevisiam Numburgensem toties à multis (nec experientiâ refragante) decantatam, ab isto reatu *Reusneri* vindicare; cum eandem potius suadendam censeamus iis, qui aliàs obnoxii sunt hæmorrhagiis, & quidem partim ad avertendum illas, partim etiam, quando eadem variis è partibus jam promanare observantur. Sic in narium hæmorrhagia eundem potum cerealem Numburgensium non temerè vel rationibus destitutus suadet amicus noster à teneris integerrimus, & jam affinis, nec non Medicus Sereniss. Ducis Saxon. CHRISTIANI Eisenbergæ residentis, celeberrimus *D. Adam. Habnins* in *dissert. suâ inaugural. Academ. de narium hæmorrhagia Jenæ 1668. habita.* In illius p. 33. autor laudatus rectè dotibus hujus cerevisiæ annectit, quòd eadem visceribus nimio æstu laborantibus, sanguinique ebullienti succurrere valeat. Cæterum de nitro à quibusdam in hæmorrhagiis commendato nihil memorabo.

§. 40. Dicta istâ ratione phthifios etiam atque hec-
tæ materia & primordia (in salino corrumpente & quasi cau-
stico non rarò nidulantia) destrui & ex corpore temporè ex-
turbari possunt, à cerevisiæ illius usu; ne causæ istæ infelices
invalescant, ros vitalis à sua consistentia temperata & legiti-
ma qualitate dejiciatur, atque ideò miserè postea pereant,
homines. In demonstratione illa verò jam non desudabi-
mus aut persistemus, quòd hæmorrhagiæ tanquam sympto-
mata vel causæ sociæ sæpe se habeant phthifios aut tabis, cum
medicæ observationes nos faciliè de isto erudiant. *Sim. Pauli
in quadrip. Botan. p. 360.* Güstroviensem cerevisiam Knefe-
nack dictam, si scilicet calefacta, cardamomi ac cinnamomi
tantillo ac vitello ovi unius condita, saccharoque edulcata,
sit, senibus tussiculosis ac emaciatis prodesse dicit. Quod
senibus æque ac juvenibus Numburgensis cerevisia sola,
vel aliis rebus congruis medicata aut analeptica reddita,
conducat, supersedemus jam fuisse demonstrare; quemadmo-
dum etiam desistimus jam denuò repetere, quæ de vi com-
modè nutriendi eidem indita superius §. 10. à nobis tradita
sunt. Non dubitamus insuper, quin ejusmodi paulò ante
dicta labes & tabes, aut tartarea, calculosa atque arthritica
mala varia, dispositione & culpâ hæreditariâ etiam in quibusdam
hominibus latentia, deleri & in herba quasi suffocari
possint, si his affecti Numburgum concedant, atque ibidem
cerevisiâ, aliisque sanitatis illius loci commodis adminiculis
utantur. Quemadmodum loci mutationem in istiusmodi ac
aliis morbis chronicis & endemiis utilem sæpe esse novimus;
de quibus in posterum commodiori occasione plura propo-
nemus. Notamus insimul hoc loco, quòd cerevisia hæc ap-
propriata atque congrua magis dictis iis atque aliis morbis
variis domandis reddi possit, si recenti illi ante fermentatio-
nem certæ & selectæ herbæ ac species medicæ immittantur;
veluti passim vulgò etiam mos ejusmodi usitatus ac notus est.
Si quis verò modum præparandi varias istiusmodi medicatas
cerevisias, paratu alias faciles, sine Medici informatione re-
scire

Scire appetit, ei adminiculum patebit ex *Coleri œconom. rurali* l. 2. c. 4. p. 24. &c. *Stengeli l. a. cap. 11.* & *Knaustini l. c. lib. 4. p. 66.* &c. Credibile omninò est, ejusmodi hæreditariæ variæ, paulò antedictæ labis mineram illo in loco eâ ratione infringi, & in meliorem conditionem immutari posse; quæ pro aliis atque aliis adminiculis insalubribus diætæ & loci alicubi citius quandoque procul dubio evolvitur & augetur; veluti de hac materia in posterum forsitan etiam in peculiari dissertatione plenius agemus. Fortean etiam chronicis & hæreditariis quibusdam malis affecti subinde levamen æquè invenirent à memoratis adminiculis Numburgi obviis, ac multi frustra in thermarum potatione quærunt; tacemus molestias varias, motus inconcinnos & pericula, fortuitò in itinere ejusmodi longinquo sæpe ad thermas istas tendentibus devoranda vel sufferenda; unde non rarò etiam pro sanitate sperata ejusmodi homines pejorem statum mortemq; ipsam sibi accelerant. Miramur insimul, cur à thermis quibusdam non deterreant multos isti haustus insignes, communi usu & præceptis injuncti. Quis scit quid futurum, aut expectandum esset à *Σεμνοποσία* cerevisiæ aut aquæ Numburgi aliquandiu continuata, in ejusmodi affectibus pertinacibus! Et eccur non deterrent peregrinos anhelantes aut accedentes ad quaspiam thermas, quidam degentes ac præsentis in hisce locis miserè affecti arthriticis malis & impotentiâ vel immobilitate artuum. Denique ut paucis adhuc Numburgensem cerevisiam in fontem hæmorrhagiæ renuntiemus, non reminiscimur Numburgi aliisve in locis ullum invasisse frequentem aut molestum narium aliarumque partium profluvium sanguinis, à solius cerevisiæ illius usu vel potu.

§. 41. Audiendi jam nobis adhuc pauci ex pluribus autoribus restant, qui meliori experienciâ de cerevisia illa instructi & edocti meliori quoque nota eandem commendant; adeò ut locus ille locum hîc ferè serîo inveniat, ubi quis *Naumb. Bier* notâ illâ vel signo NB. expressit. In primis

verò,

verò, qui literis dediti sunt, notent sibi eam, vel similem cerevisiam congruam esse; & juvenes quidem ob calorem suum juvenilem, ac futuram nutriendi facultatem mediocrem sibi necessariam. Non spernant itidem illam ii literati, qui virilis sunt ætatis, morbisque tartareis, hypochondriaco &c. obnoxii, propter vitam suam sedentariam, aut hæreditariam dispositionem. Hi pariter in dicta cerevisia procul dubio levamen invenient propter ipsius facultates medicas, & tamen modicas simul, quæ propterea benè notari ac usurpari meretur. Talismodi potum literatis opportunum statuimus paulò pluribus verbis in *dissertat. de literat. potu. Simon Pauli l. a. p. 380.* Rostochiensẽm cerevisiam propter lupulum, lienosis valde commendabilem renunciat, atque similem, hanc medelam, propter lupuli aliarumque conditionum referantium ac evacuantium adminicula Numburgensi potui hordeaceo denegare non possumus. Annectimus his non immeritò laudes ab aliis illi assignatas & Germanicò hoc rhithmò, ac tritò quasi evectas, nec non à *Knaustino l. a. annotatas hoc modò:*

Numburger Bier

Ist der Thüringer Malvasier.

Si Salanæ nostræ Procerum ac Professorum Medicinæ scripta & disputationes replicare vellemus, non simplicem illius liquoris Cereris usum & æstimium in variis morbis consignatum & commendatum comperiremus; quibus tamen nostrum non est jam inhærere.

§. 42. Si quam laudem aliàs meretur cerevisia in Dania passim reperienda, juxta testimonium *Th. Bartholini in Medicina Danorum p. 11. § 12.* videlicet quòd vetusta & defæcata illa non alat tantum, & nutriat, sed ventriculo robur etiam addat, præsentì plurimorum in ista regione morborum remedio. Porro modò laudatus autor vult illam, cerevisiam ab articulis podagram avertere, calculos expellere, & viscerum oppilationibus inservire, si absinthiò vel lupulo condiatur, eamque denique affectionibus internis & exter-

externis instar balsami mederi, idque testari, ait, incolarum floridum colorem, formam elegantem & integram corporis constitutionem. De iisdem & aliis pluribus encomiis cerevisiæ Danicæ, & quod continuatus hujus potus vino præferendus sit, utpote quod multis morbis ansam præbeat, *idem autor ibidem p. 160. Sc. § 320. differit.* Utut bonos hos effectus, nobis alioquin incognitos, in dubium non vocemus, nostræ tamen cerevisiæ toties decantatæ laudes istiusmodi derogare nemo facile audebit, aut pollebit; uti partim ex præcedentibus innotuit, & palam ulterius fiet ex proximè sequentibus. Exaltari quoque vires & medicas magis conciliari posse variæ cerevisiæ, si huic indantur species aut medicamenta varia, non procul ab his antea indicavimus. Nihil prohibet etiam, quin Numburgensi hordeaceo potui ante fermentationem indatur Chrysanthemum latifolium, ut inde similis decantata cerevisia medicata fiat, ac illa quam voce Preußing appellari, ac per Europam venalem nec non usitatam dicit *Sim. Pauli (l. a. p. 258.)* ubi scilicet quis ex alto decidit, contusus aut ossa fractus, ut scilicet ab ejus haustu æger largiter sudet; Gedanenses quoque suæ cerevisiæ eum in scopum & ad dissolvendum sanguinem congruatum herbam istam admiscere ex *Tabernamontano* docet citatus *Pauli*. Efficacia Medica verò atque laus cerevisiæ Numburgensis simplicis experientiâ & Medicorum celeberrimorum suffragiò comprobata fecit, ut eadem pluries in remotis locis, scilicet Italia, Anglia, aliisque in regionibus deprehensa atque usurpata fuerit. Imò potus ille etiamnum à magnatibus, literatis aliisque hominibus propter certos affectus à se avertendos, & sanitatem conservandam in multis locis (etiam pluribus milliaribus distantibus à Numburgo) quotidie ferè bibitur. Proinde illa non immeritò in catalogo cerevisiæ bonæ variæ locum invenit; veluti ex *Mart. Zeileri cent. 2. Epistol. 18. p. 342. Henr. Knaustini l. c.* aliorumque autorum libris, & imprimis eorum, qui de cerevisia peculiariter scripserunt, passim constat.

§. 43. *Reusnerus* in carmine superius adducto memorat alvi profluvium vel proluvium (uti quidam legunt) procurare cerevisiam Numburgensem, cum quo conspirat etiam aliorum testimonium ab experientia non alienum. Sic Consul atque Physicus Numburgensium quondam meritissimus *D. Petrus Crusius* apud *Greg. Horstium* in oper. tom. 2. l. 2. obs. 32. f. 203. ita scribit: *In hydrope pro potu concessi cerevisiam Numburgicam, quæ quia multum nitri continet, potenter alvum & urinas movet, unde rariùs de morbis tartareis, ut sunt nephritis, calculus & podagra, nostri homines conqueruntur. Quantum autem sanitatis adjumentum persentiscant, uti reliqui homines, ita præcipuè literati in diætâ ordinaria, si binæ illæ excretiones ritè succedant, & alvus præcipuè decenter laxa sit, nostrâ & aliorum experienciâ Medicâ atque privata confirmare, valeremus, si opus foret. Literati quippe facile adstricta, alvô laborant; & juvenes quidem primò, quia humidum, à colore illis insito & forti, vel aucto ab exercitiis in iis facile dissipatur. Adulta item literatorum ætas sedentariæ vitæ dedita motuque sufficienti destituta alvi tenacitatem non rarò contrahit & fovet; idque multò citiùs, si quis sufficientem, atque congruentem potum non admittat. Tacemus hypochondriacum malum, tum propter alvum difficilem, tum alias causas plures illis magis frequens ac molestum, unde literis dediti potu ejusmodi salubri dictis viribus instructo ac sufficienti opus habent. Veluti horum uberiores mentionem quoque fecimus in *dissert. de liter. potu* c. 2. §. 36. & *Matthiolus* apud *Cratonem* in *Consil. med.* 182. f. 518. de literato quopiam vitæ sedentariæ addicto, & ideò inter alia hypochondriacò morbo affecto agens annotat, quòd ille levatus fuerit alvi subductionibus; eidem autem *Matthiolus* l. a. f. 524. dissuadet cerevisiæ potum, cum illam arbitretur generare sanguinem crassum ac turbidum; verum istud à triticea vel alia crassa & forti cerevisia citiùs quàm à Numburgensi metuendum est. Hanc enim adminiculis cæteris curationis non sepositis, magnum levamen suggerere confido, propter*

laxantem aliasque vires referantes plures, morbi illius curationi congruas; si scilicet cerevisia illa decenti modo & quantitate sufficienti bibatur.

§. 44. Hæc autem cerevisia neutiquam est metuenda vel fugienda propter insitas illas, atque hæctenus dictas facultates medicas, ac si propter has alia mala ista corpori adferat; cum constet quod minimè ciborum digestionem legitimam, sanguificationem item & nutritionem turbet. Nitrosâ suâ blandâ potestate concessa insuper cerealis ille potus sanguinem & serum non permittit in tartaream, calculosam, muraticam aut aliam similem vitiosam materiam concrecere aut mutari, quæ aliàs obstructionibus, tumoribus, doloribus & aliis malis contrahendis moram & ansam subministrat. Hac itaque potestate, nec non suâ vi diuretica magnam & salubrem vim largitur eadem cerevisia, quod à nobis antea laudatus *D. Crusius l. a.* rectè monet. Non multùm à sententia modò adducta recedit *Val. Andr. Mollenbroccius de Arthrit. vag. scorbut. c. 12. p. 190.* Cerevisia Neoburgensis, ait, quæ ob aquam, ex qua coquitur, salia martialia & multum nitri continet, unde alvum & urinam potenter movet; hinc Numburgenses rarò de tartareis conqueruntur morbis &c. Utrum juxta *Helmontium* cerevisia tenuis pernoctata vim majorem pellendi urinam acquirat ignoramus. Communiter tamen Cereali liquori omni tribuitur facultas diuretica, quamvis altera citiùs (& sine majori molestia, scilicet stranguria &c.) eandem exferat quam altera; quâ bonitate tuta non caret Numburgensium hordeaceus potus.

§. 45. Salia neutra verò alioquin (quale quid Numburgensi cerevisiæ inest, uti præcedentia hoc dilucidant,) apta sunt ad incidendum mucum variarum partium, & sic etiam meatuum geminorum præcipuorum excretionibus dicatorum; stimulant insimul eadem partes illas ad excretionem: veluti tartarea medicamenta, cremor scilicet, acidum illius, arcanum & terra foliata ☿ri, ♀ ⊕ latus, item ⊕, aut ⊕ tiatum, ac spiritus mineralium; & quidem magis acidi hi

existentes diuresin citius, priora verò salia & spiritus neutri catharsin & diuresin adjuvant. Ideoque etiam istiusmodi medicamenta neutra (acida puriora enim purgantia plurima figere magis videntur) purgantibus admixta faciliorem ac feliciorem operationem impertiunt; quod promptius etiam.

Øgtum efficit. *Matth. Tillingius de recidivis c. 25. p. 458.* pro recidivis curandis in diætâ inter paucas alias Numburgensem cerevisiam in fronte ponit. Nec irritâ intentione, id fieri credimus; siquidem morbi facilè recidunt in primum locum & statum corporis, si non funditus illorum minera, evacuationibus sufficientibus (etiamsi clandestinis, aut in sensus non adeò semper incurrentibus id fiat) eluatur aut exturbetur. Quod & quomodo verò evacuationibus blandis cerevisia isthæc inserviat, sufficienter, uti arbitramur, hætenus exposuimus; ideoque illam etiam in multis recidivis, vel harum aversione, (inprimis quando excretiones non succedunt) commendamus; plura interim de morbis istiusmodi revertentibus in commodiorem locum, differentes.

§. 46. Posthæc de salubritate laudati Cereris liquoris, ut & causis hujus à mineralibus profluentibus agit etiam politissimus quondam inter Celebres Lipsiensium Medicos, maturâ admodum morte publico commodo subtractus, videlicet *D. Christ. Langius in Genio Thermarum c. 2. §. 89. &c.* Inter alia plura verò autor laudatus illic de Numburgensi tractu, mineralibus variis fæto declarato (quamvis nobis non constet de quopiam peculiari vel notabili minerali hætenus illic observato) differens, iis tribuit etiam sequens negotium. Tritô scilicet vernaculô nota ac obvia observatur tempestatum ac procellarum divulsio atque separatio, die *Wetterscheide*: quâ scilicet fragor & tonitrua in nubibus concurrentibus & collidentibus solvuntur, ac postea componuntur, vel evanescent. Locum autem hunc non procul à Cusna *Rösen* prope cœnobium vel scholam Electoralem Saxoniam Portensem ostendunt; ubi etiam pons ille, quô strato Salam.

transcendere licet, nomen à Cusna ducit, ac dicitur die Röss-
nische Brücke. Præterea laudatus *Langius* innuit tractum il-
lum, qui cingit Numburgum, prodere salia vel latentes mi-
neras propter colorem terræ, vel montium, horumque la-
psum aut motum aliquem aliquando illic annotatum; quem
tamen crebro illic observatum, non recordamur nos uspiam
legisse, audivisse aut expertos esse. Tandem idem allega-
tus *Langius* l. c. §. 99. pergit: cognoscat hinc lector curiosus
decantatissimam cerevisiæ Numburgensis virtutem, quæ ut
hactenus à posteriori eam laudantibus vel usurpantibus non
fuit ignota, ita ut à priori quoque omnibus sit nota jam,
præmissa investigantibus. Ergo ante oculos nunc est,
cur incolæ Numburgenses & eorundem adcolæ calculo-
so & arthriticô cruciati non tam frequenter, imò rarissimè
adficientur, quàm aliorum locorum inquilini. Nos fane
non miramur, cum uti jam declaravimus illi familiariter,
cum cibus & pro potu his utantur aquis probe resolventi-
bus &c. hactenus citatus *Langius*.

§. 47. Sublevat itaque dicta cerevisia inquilinos Num-
burgi inprimis à malis arthriticis, scilicet podagra (quod
etiam testatur *Justus Stengelius* l. a. cap. 9. *dissertatio allegata*
de Braxatione aliique autores plures) chiragrâ item & cal-
culô; atque sic non relinquit palmam Persiæ, quæ incolas suos
dicitur non pati calculô vel podagrâ infestari, idque propter
vinorum Schirasticorum usum, juxta sententiam *Olearii* in
Itinerario Persico, veluti colligimus ex *Mæbii Institut. Med.*
p. 516. Non cedit quoque cerevisia eadem effectibus herbæ
vel decoctæ Theæ, quod Sinenses pariter non permittere di-
citur podagra laborare; utpote quod ultra modum sangui-
nem purificet, partim per sudorem, partim per urinam, de
quo *Excell. Paul. Ammanus de mater. med. p. 65. &c.* Sed de
Japoniorum ac Sinensium potu in *dissertatione de literatorum*
potu c. 2. §. 30. plura monuimus. Quantumvis aliàs cere-
visia omnis ferè, aut quæpiam solum certorum locorum in
podagra suspecta censetur à quibusdam medicis, uti claret

ex *Mart. Schoockii de cerevisia* c. 45. p. 383. & *Joh. Dornereilii medulla prax.* l. 1. c. 17. p. 137. id tamen, uti hactenus explicavimus, de Cereali Numburgensium potu intelligendum vel metuendum est minimè.

§. 48. Hamburgensi cerevisiæ easdem (& pene majores nec non ad omnes morbos utiles vires) ac Numburgensi quidam tribuunt; quod tamen non ita, vel saltem citius de antiqua, nec moderna illa cerevisia admittit cum *Placotomo citatus Schoockius* l. 1. cap. 43. p. 375. Rarò equidem Hamburgi degentes & cerevisiam illius loci bibentes podagrâ vel arthriticô morbô affici; catarrhò tamen asthmate & renum morbô nonnunquam infestari scribit *Henr. Ranzovius de conservanda valetudine* cap. 8. p. 33. Plurimi quoque autores vires ipsius cerevisiæ exponentes tradunt, quòd faciei ruborem vel guttam rosaceam inducat iis, qui paulò largius istam bibunt; veluti hoc ex *Joh. Coleri œconom. rural.* l. 2. c. 4. p. 23. *Jac. Theodori herbar.* l. 1. c. 20. f. 662. aliisque pluribus autoribus constat; atque sic hæc cerevisia vini, spiritus vini, aliusve potus generosi qualitates atque effectus quadantenus æmulatur, à quibus aliàs faciei status iste, aliaque incommoda plura metuenda emergunt; nisi moderatus illius usus metum hunc excutiat. Sed pluribus id pervestigare superfedemus, cum de talismodi cerevisia recordemur nos in præcedentibus, scil. §. 7. egisse. Non erubesceremus interim medellam potius quærere, & nobis promittere contra dictum ruborem in obscuri coloris cerevisia Numburgensi delitescentem. Porro siue dubio Numburgensium potus cerealis, quia calculum, tartaream ac tophaceam Arthriticorum morborum, mineram arcet ac imminuit, in similis originis aliis malis itidem salubris declarandus est. Sic minùs coactè forsitan illi propter hanc aliasque plures facultates notas applicabimus verba *Fort. Fidelis in Relationibus med.* (quæ fictum titulum etiam paucos ante annos induerunt, & eò à quibusdam ignaris confidenter allegantur, scilicet *consultationum Thom. Reinesii*) sunt, inquit, aquæ frigida nitrosa, quæ per alvum purgando etiam strumas imminuunt.

§. 49. Gratulantur sibi sæpè alioquin loca varia, & Academia quæpiam de certis quibusdam prærogativis, inter quæ plura alia non parum etiam excellit loci nostri montibus cincti salubris conditio, & potus inprimis varius sanitati non offensus; veluti etiam potu cereali Numburgensi quivis facili negotiò ac pretiò potiri potest. Illius verò magna quantitas quovis anno apud nos consumitur, non sine multorum sanitatis corporisque tranquillæ status adjumento. Non minus eadem cerevisia aliis locis multis suadenda foret, quâ propter levicula impedimenta vel causas interdum privantur. Iis autem, qui studiis navant operam, apprimè utilis est, ille (atque similis mediæ constitutionis) liquor Cerevis, veluti hoc & ipsius rationes pluries indicavimus. *Mart. Schoockius de cerevis. c. 46. p. 392.* queritur de cerevisia secundaria & cibis crudis minusque accuratè coctis, quibus subinde studiosa juvenus alitur (principum aliorumve liberalium munificentia) in convictoriis vel contuberniis publicis Academicarum vel Scholarum; unde valetudinis dispendium omninò metuendum, atque eidem è contrario prospiciendum foret præcipuè de ejusmodi salubri ac mediocri laudata cerevisia, videlicet non nimis forti vel generosa, nec nimis segni; de quo si plura placent rescire, iterum *dissertatio nostra de literator. potu §. 20. &c.* evolvi potest.

§. 50. Laudat aliàs in morbis acutis cerevias tenuiores *Helmontius de vict. ration. §. 22.* cum quo conspirat etiam laudatus *Schoockius l. a. p. 305.* Subscribit eidem sententiæ non invitus *Vit. Riedlinus in Obs. Med. cent. obs. § 7. p. 131.* autor hic illic etiam arbitratur, quòd mulier quæpiam petechiali febre laborans, ac minus congruæ cerevisiæ magnam quantitatem ingurgitans viventium cætui subtracta sit; quod fortè à copia & frigiditate cerevisiæ citius, quàm à temperato ejusmodi potu cereali, in febre ejusmodi dubii communiter aliàs status, accidit. Cæterùm hordeaceum etiam potum triticeo præfert, eumque in febribus ac morbis acutis rationibus certis permotus suadet *Hier. Mercurialis in prælect. Bo-*
noni-

noniens. f. 499. De quo etiam *Dan. Sennertus de febr. l. 2. c. 9. p. 143.* Adductis his addimus, quòd in febribus, præter subdulcem & acidiusculum saporem potus, ut plurimum simplicissimus, nec multis qualitatibus sapidis præditus expetatur; de quibus iterum non nulla continentur in *dissert. de literat. potu c. 1. §. 22. &c.*

§. 51. Constat alioquin, quòd in febribus aliisque morbis multis facilius reddatur curatio, si duæ frequentiores illæ evacuationes corporis, scilicet alvi atque urinæ, vel sponte vel aliò leni diætæ adminiculo succedant; Sic enim à centro & nobilioribus partibus morbificæ materiæ portio demitur, & ad ignobiliora loca pedetentim derivatur. Imò si non succedant evacuationes geminæ istæ, vel aliæ commodæ, morbi facile protrahuntur, aut recidivi fiunt, veluti paulò superius §. 45. hujus quadantenus mentionem fecimus. Huic verò scopo si alterans, lenis ac salubris potus cerealis ordinarius inserviat, nil commodius pro ægrotorum curatione leviq; nutritione expeti potest. Talismodi evacuationes necessarias subinde Medicus etiã stratagematibus vel indirectè intendere tenetur, ac obtinere potest, quando immorigeri, morosi, timidi aut ultra suam sortem sapientes curandi sunt: dum scilicet hi modò hanc, modò illam feri evacuationem necessariam admittere detrectant, & jam virium jacturam, jam aliud quid mali futurum inde verentur. Quando itaque istis non semper obloqui vel refragari licet, propter confidentiam & reliquum obsequium eorundem captandum, medicamentis ordinariis gata, scil: $\frac{1}{2}$ diaphoreticum, Bezoarticum minerale, vel alia similia diaphoretica & tuta ex $\frac{1}{2}$, aut cinnabari varia præparata admisceri possunt: utpote à quibus simul alvus non facilè subsidet aut obstruitur. Interim confortantium vel aliorum medicamentorum, auditu magis gratorum, titulis vel inscriptionibus opus habent Medici, quibus insigniant medicamenta illa propinanda, ut eadem suffunderentur istis sordes suas morbificas ac rebelles, in corpore adeò

studiosè vel meticulosè, minùs tempestivè tamen, ab illis sæpe custoditas. Atque istò modò Medicus legitimè & citra scientiæ atque conscientiæ labem mirabilia ægrotantium, quorundam capita fallere & πάλυμορφον se gerere debet, de quo nos alio loco forsitan plura sistemus.

§. 52. Non displicet itidem nobis in febribus usus fructuum quorundam acidiusculorum, aridorum tamen & variò modò in usum admissorum, loco carnis variæ & jusculorum coctorum ex eadem, pro refectione à quibusdam, adeò commendatorum & vulgò approbatorum; in quam sententiam nos deducit *Zwölfferus in Pharmacop. Reg. p. 226. &c.* Abeunt quippe ex carne parata (propter symbolum propinquius) citius in humanam & morbificam constitutionem, quàm fructus: quos itidem non adeò, quàm cibos istos plurimi ægroti averfantur. Fructus autem ejusmodi, videlicet pruna, rotunda acidiuscula & alia, cerasa item ac cæteri fructus acido-dulces præbent quasi julapia sicca, uti & humida postea, educta ex iis, si coquantur; qui fructus alterandæ materiæ febrili ac infringendis symptomatib9 quibusdam non inepti, nec ægrotis, uti diximus, ingrati existunt. Siti enim & calori resistunt, nec nõ languenti appetitui ventriculi resuscitando succurrunt; prospiciunt itidem iidem corpori de geminis potioribus evacuationibus dictis, scil. diuresi atque alvi laxitate. Porro cum ejusmodi fructuum jusculis vel brodiis sæpe etiam panis arridet palato, vel alii cibi iisdem conditi. Meditentur interim curiosi, cur febribus detenti adeò carnis usum odio prosequantur atque acidiuscula & subdulcia expetant; Cæteris itaque paribus, & non neglectis curationis circumstantiis, mediisque necessariis in febribus multis non temnenda esse acida opinamur. Elegantem & uberius explanatum hanc, in rem locum lector benevolus de succo limonum, varios ob effectus proficuo in febribus, reperiet apud *Guil. Pisonem in histor. natur. § med. l. 5. c. 20. f. 315.*

§. 53. Haecenus memoratis scopis curationis in febribus attendendis non parum etiam infervit cerevisia Numburgensis, cujus saporem si quis non nauseat, minus temnendos effectus ab eadem capiet. Promittit enim bonum successum nitrosa ipsius qualitas & inde dependentes facultates à nobis indicatae §. 44. &c. In quam rem facit quoque ventilata & plurimum approbata quaestio in *Plegni Zodiaco Medico-Gallic. Anno. 2. qu. 15. p. 23.* an aquae minerales sint febri-fugae. Strignicensem cerevisiam alias propter terram salubrem illic obviam, (quae sigillatae notae materiam praebet) laudat pro pestis praeservatione vel aversione *Joh. Colerus in oeconomia rural. l. 2. c. 4. p. 23.* Interim si ad effectus salutares Numburgensis cerevisiae atque operandi modos haecenus perlustratos respicimus, nihil dissuadet in peste quoque ipsius usum. Sic Excell. D. *Gunth. Christoph. Schellhammerus in diss. med. de peste habita Helmstadii 1682.* disquirens de cerevisiae variae conditione, & quae in peste commodè usurpari possit, rejicit Breihanum atque sic porro concludit: Cerevisia lupulata non sit crassa aut caput feriens, gravansque ventriculum, qualis est mumia Brunsvicensis; sed tenuis ac mitis, facile transiens, in quibus eminet in Misnia Naumburgensis, ob omnes illas dotes celeberrima, quae sine dubio in peste maximè omnium convenit.

§. 54. Quæri forte etiam posset hoc loco, utrum haecenus à nobis commendata cerevisia etiam tuto usurpari possit in dysenteria, diarrhoea, vel aliis fluxibus alvi. Proinde in hanc quaestionem allegare nobis libet *Mæbium in instit. med. p. 194.* Cerevisia Numburgensis, inquit, ut & aliae ex aquis mineralibus coctae, saepius in iis, qui facillioris sunt alvi, vitiosos commovent humores, & salubrem diarrhoeam excitant. Atque ea quidem laxandi potestas salubris plurimos beat eventu non evanido, utpote qua in tempore vitiosi humores è corpore educuntur, qui subinde morbidis vel symptomaticis alvi fluxibus ansam praebere pollerent, aliosque

suo contagio polluere valerent. Perrarò autem Numburgi
 dysenteria vel alii alvi enormes fluxus observantur, nisi fortè
 contagiò quopiam epidemiæ dysenterix illuc transferantur,
 victuve inordinatò in autumno (quod admodum rarò ta-
 men etiam contingit) excitentur ac propagentur. Addo his
 insimul, quòd causa dysenterix non ultima fortè in humori-
 bus eorumque vasis delitescat, unde in correctione eorun-
 dem ad diaphoresin præcipuè, aut si non omnis, non ultima
 tamen curationis ratio & intentio dirigenda est; & ad hæc
 quidem citius, quam ad styptica nuda. Iis itaq; ritè observatis,
 & si tandem terra sigillata, C. C. ustum, aliaq; similia congrua
 cerevisiæ huic addantur, metus exsulat. Sic acaciæ Germanicæ
 succum cerevisiæ vindemiarum tempore inditum gratum,
 saporem, vino vetusto rubello minùs cedentem, & vim ad-
 stringendi alvum, & roborandi ventriculum conciliare inno-
 tescit ex *Sim. Pauli quadr. Bot. p. 13*. Idem illud cerevisiâ Num-
 burgensi, aut si aliis rebus medicata vel congrua magis in al-
 vi fluxibus redderetur, tentari posset. Vel sola etiam illa sine
 magna suspitione admitti potest pro potu; modò non re-
 cens, fæculenta, frigida & copiosa illa bibatur. Accidit qui-
 busdam subinde, qui peregrè adveniunt Numburgum atque
 illam cerevisiam unò vel alterò die bibunt, ut non statim vim
 ipsius decantatam laxantem persentiscant: Id verò inde o-
 riri credimus, quòd vel sudore largò in itinere profusò, vel
 evacuatiò rore corporis per insensibilem transpirationem,
 postea vasa depleta, humidam potus materiam promptius ex
 intestinis absorbeant vel arripiant, unde alvus laxa non ita
 observatur ab ipsius cerevisiæ surrepto potu; veluti meta-
 stases ejusmodi aliæ variæ humorum in Medicina non sunt
 ignotæ. Atque eâ ratione fallacia secundum quid occur-
 rit, dum cerevisia hæc minùs laxare, sed obstruere alvum,
 magis videtur, veluti paulò post aliud simile quid §. 56.
 examinabimus.

§. 55. Multi autores etiam in colica proscribunt cerevisiam variam, vel omnem propter ejus potentiam in flatu pronam; verum non veremur itidem credere, quod colicæ varia adminicula tum à cibis, tum ab humoribus corporis vitiosis (partim in intestinis ortis, partim verò ab aliis partibus ad hæc deVectis) orta temporì iterum Numburgensis cerevisiæ usu corrigi & ex corpore eliminari possint, propter dictas evacuationes, ne colica ab eadem multum metuenda sit. Non recordamur insimul insigniter molestam esse colicam labem inquilinis Numburgi: norunt præterea praxin medicam exercentes, quod obstructio alvi sæpe juncta sit, colicæ passioni dictæ, quam si non in curatione simul respicit Medicus, parum sæpe proficit. Proinde carminantia cum incidentibus & laxantibus non dissuaderemus in eodem affectu, veluti etiam pro pharmaco vel potione calida & clystere, cerevisia illa admitti posset. Non æquè verò suaderem in colica aliam paganam cerevisiam minùs coctam, aut alias propter vitiosas qualitates suspectam, cujus mentionem supra §. 17. quadantenus injecimus. Dehinc frigidus & copiosus potus quicumque post pingues cibos præcipuè fugiendus est, cum multi colicam ideò facile contrahant, quæ fortior quoque metuenda est à malæ notæ ejusmodi pagana cerevisia.

§. 56. Præterea non est tanti momenti objectio quorundam, ut quis frigiditatem potentialem in cerevisia nostra laudata vereatur eamque aversetur; cum glaciem in corpore minimè generet, vel partes ullæ inde congelascant. Quod verò quipiam arbitrentur ventriculum propter ipsius frigus lædi, & vino interponendò opus esse in illius potu ordinario, quo scilicet frigus ejus ventriculo molestum corrigatur, illud ita intelligendum esse sciant ii, qui hujus ignari sunt. Adultæ quippe & virilis in primis ætatis homines, qui non asseverunt cerevisiæ illius usui ordinario, præcipuè si antea calidam magis vel generosam cerevisiam biberunt, iis ventriculus inde quadantenus languere videtur, præcipuè si frigi-

da ipsius haustus largi admittantur, aut si aliis potulentis ac esculentis in convivii ventriculus sit adimpletus, aut ventriculi adsit debilitas, ob vitam sedentariam aliasve causas plures. Neutiquam tamen hoc iis evenit, qui assvescunt continuo & ordinario, non tamen immoderato illius ceralis potus usui. Eloquantur hanc in rem suam sententiam & experientiam infiniti juvenes, quos studia juvant vel recreant hac in Salana, nec fileant alii plurimi eruditi adulti atque alius sortis homines effectus à cerevisiæ hujus non infrequenti usu sibi notos! Meliora omninò judicia nobis pollicemur, non attingentes vel examinantes id prolixius, quod juvenibus vel studiosis literarum aliisque hominibus, calidâ aut ad tabem inclinante constitutione præditis egregiè congrua sit ea ipsa, uti pluries in præcedentibus hoc inculcavimus. Deinde, quòd hætenus dicta à nobis, non aliena sint à veritate, comprobant Numburgi incolæ infiniti, qui neque ventriculi neque aliarum partium frigus aut languorem ex cerevisiæ suæ usu ordinario & non immedico pertimescunt aut persentiscunt. Non indigent itidem iidem inquilini vini potu corrigente cerevisiam suam, siquidem etiam illud omnes tenuioris conditionis homines propter egestatem redimere ac bibere non valent, uti facile cuivis notum est; taceo quòd à secundaria cerevisia etiam pauperes illic nihil illius mali experiantur.

§. 57. Si inquiramus in ventriculi coctionem vel constitutionem legitimam, erudiunt nos modernæ Medicinæ principia, quod non à calore simplici potenciali atque actuali proficiscatur ventriculi coctio & chylificatio; siquidem constat, quod ferrum non adeò ignis, quàm acidiusculus ventriculi humor consumat: uti *σινδροπτεψία* Struthio Cameli, vel aliarum avium & animalium potens ventriculi digestio comprobat. Porro frigus moderatum & vehemens sæpe non obest actioni vel coctioni ventriculi multorū animalium, siquidem etiam conchis, testaceis animalibus ac reptilibus vel insectis,

ac piscibus parum inest caloris, veluti iisdem brutis æque ac aliis plurimis parum cibi vel potus calidi porrigitur; nec tamen ventriculi labor aut actio læsa admodum iis inde oritur, uti non nihil in hunc modum differuimus *dissertat. de literatorum potu c. 2. §. 24. &c.* Ventriculo itaque propria, specifica & peculiaris est ejusmodi actio cibos digerendi, quam etiam dilucidant quadantenus medicamenta & alia adminicula juvantia eandem; scilicet siccantia, acidiuscula, austera, (& talia interdum amaricantia, non alia tamen indifferenter omnia) item acria & spirituosæ sulphureæ &c. Destruunt verò ventriculi tonum & officium nimia humida, pingua, purgantia, salina, alkalia & biliosi humores. Sic in febribus & æstate, languet ventriculus, sine dubio ab humoribus bili analogis magis tunc temporis obviis vel auctis; nec hyeme à frigore ventriculus debilior redditur, quæ probatione non indigent. Ætiologiam autem istam, quæ veteres in æstate ventriculum frigidum, in hyeme verò calidum declararunt, jam attingere superfedemus, cum non ignoretam eandem credamus. Non reluctari itaque illam cerevisiam ventriculo ipsiusque chylicationis & subsequentis nutritionis negotio (si sine excessu quopiam frigidi, copiosi aut intempestivi usus bibatur) autorum quorundam testimonia in præcedentibus adducta confirmant, nec experientia iisdem reclamat.

§. 58. Deinde inficiari non audemus, quod à commixto largiori potu hujus cerevisiæ & vini in conviviiis major nausea & vomitus citius concitetur, quàm à solo vino; quod à quacunque cerevisia alia pariter metuendum est. Quantumvis autem aliàs major meri quantitas, & citra nauseam, in ventriculo subsistere aut contineri possit, si in conviviiis magnis certandum est culullis, illud vinum tamen postea in vasa absorptum mala varia minatur. Cerevisiæ verò potus, vel nigra litera albæ, scilicet vino interposita, (juxta potato- rum loquendi formulam) supernas & infernas excretiones
gemi-

geminas citius promovet, atque sic brevi quapiam molestia, hic geminus usus mixtus antevertit incommoda à vini solius potu alioquin in corpore diutius asservati metuenda. Istiusmodi in finem quidam etiam utuntur pilulis variis laxantibus ante poculorum certamen, de quo *Salmuthus cent. 3. obs. 44. p. 133.* Veluti eundem in scopum quoque nonnullos pilulas *Glassianas* commendare atque usurpare novimus. Sic olim etiam eam ob intentionem inter alia promulsis præbitionis, & lactuca antecœnii loco convivis oblata fuit, quò excretiones promoverentur, de quo *Jos. Laurentius in Polymathia l. 1. diff. 7. f. 17. &c.* Nihil memorabimus jam de herbæ *Theæ* essentia, infuso, aut decocto, quod contra ebrietatem munire atque urinam simul movere dicitur. Sed de his quibusdam & de crapula deteriori à cerevisia quàm à vino, juxta quorundam mentem declarata in *dissertat. de literatorum potu* egimus.

§. 59. Pro luce majori hætenus dictorum citamus iterum *Isaac. Schoockium in cent. problemat. histor. Med. Physic. problem. 14. p. 13.* Ventilât autem ille hanc quæstionem: cur, qui molestias sentiunt à crapula cerevisiaria, sibi medicinam facere soleant superbibendo spiritum vini, quem vulgò vinum adustum vocant. Similiter docet *Bald. Ronssens in Epist. med. 64. p. 223.* momentum spiritus vini sublimati jejuno stomacho sumptum vini molestias à pridiana crapula, corpori contractas corrigere. Quòd verò ventriculum hætenus dictus spiritus corrigere & corrugare, vel veterū loquendi modò calefacere polleat credimus, qui languidus flaccidus & frigidus quasi, suiq; muneris immemor antea erat, propter molestias à potu in eundem redundantem. Sic purgantia medicamenta ventriculo alioquin ingrata, illumque turbantia, uti & vomitoria medicamenta nonnulla infringit quadantenus spiritus vini, ac potentiùs acida. Tacemus quod in dictis evacuationibus enormibus cum non nullis morbis se jungentibus sæpè auxilio sint bina dicta, scilicet spirituosas atque

atque acida. Verum utrum dictus spiritus vini, & largior quidem hujus usus, adeo pote auxilium sit reliquo corpori vinô adimpleto, si crapulæ exilium in eodem quærat, vix credimus; modò non exitium sanitatis inde aliud insimul resultet. Sed attingimus hoc quadantenus, ubi de *pilis caninis*, vel novo potu largo crapulam priorem, juxta quorundam opinionem, discutiente egimus in *dissertat. de literator. potu* c. 2. §. 56. Ex eodem loco etiam innotescet *Sennerti* sententia & consilium, quod modicus vini usus crapulæ hæsternæ molestiam quadantenus corrigat.

§. 60. Pro defensione cerevisiæ Numburgensis hætenus suscepta relabi adhuc semel tenemur ad *Reusnerum*, qui scribit quod ab eadem cerevisia

Ægrifici ventris cedat & omne malum.

Sic à cerevisia Numburgensi materia vitiosa ac biliosa in corporis recessibus stagnans, & ructus aut insultus ventriculi vel choleram minans & excitans, si scilicet ad ventriculum vel intestina labatur, illa inquam materia partim corrigi prius, partim etiam ante istam tragædiam è corpore maturè extrudi potest vi cerevisiæ laxante. Hac itaque ratione abundè innotescit, quod cerevisia ista ventriculo non multum molestiæ vel negotii faceßat. Alioquin moderato etiam vini usui non ineptè potus cerevisiæ mitis alius, & Numburgensis inprimis, admisceri potest, veluti postremam hanc etiam in conviviis adeò communiter sub vini & nicotianæ usu expeti his in locis diximus, in *hac & de literatorum potu dissertatione* c. 2. §. 88. *Mart. Schoockius de cerevis.* c. 47. p. 395. & 396. usitatam quibusdam parodiam allegans, quæ statuunt:

(Interpone tuis interdum biria vinis)

non dissuadet item vini potui interponere tenues cerevisias, minus autem fortes; cum aliàs etiam pro vini robore frangendo à quibusdam aqua eidem admisceri soleat. Si quis

verò tandem certò comperiat iteratâ experientiâ, (nec man-
câ, antea à nobis impugnatâ, aut *ὀνομαστία* abreptus & de-
ceptus) quòd sibi minus apta existat illa vel alia cerevisia,
ei illam neutiquam obtrudemus; veluti aliquoties in hac &
in altera nostra dissertatione allegata indicavimus, quòd qui-
libet, juxta *Syracidis c. 38. v. 1. &c.* probare debeat, quæ cor-
pori vel ventriculo suo congruant. Medicus quippe à prio-
ri non omnium naturam unico modulo vel regulæ aptare
potest. Proinde etiam nostra facimus verba *Bordingii in
methodo ad Galeni libros de tuenda sanitate c. 9.* In usu cere-
visiarum, inquit, cujusque natura exploranda est, atque ea,
offerenda, quâ quisque maxime delectatur ac minimè læ-
ditur.

§.61. Deniq; etiam usum externum cerevisiæ Numburg.
præterire siccò pede nolumus, quem æquè, ac alius variæ ce-
revisiæ ab autoribus quibusdam laudatum, haud vanum fore
opinamur. Sic non dubitamus eam cerevisiam vi blanda
molliendi, resolvendi & aperiendi præditam atque con-
gruam esse, si hæc cum aliis emollientibus cataplasma, fotum
balneum, aliasve similes formulas constituat aut subeat.
Hinc in tophis & tumoribus variis, etiam tartareis ac scor-
buticis, uti & podagra, ischiatico malo, nephritide &c. uti-
lem illam ducimus. *Sim. Pauli in quadr. Botan. p. 380.* Lupuli
flores pro vario externo usu commendans sic concludit:
Imò, inquit, recordor paroxysmum podagricum mitigatum
hujus usu, dum quidam æger fotu lupuli, simul ac cocta erat
cerevisia, pedes foveret. Idem hoc majori confidentiâ lu-
pulô Numburgi collectô post cerevisiæ coctionem, aut
recentibus etiam floribus cum Numburgensi cerevisia aliis-
que rebus pluribus congruis mixtis atque coctis tentari pos-
set in doloribus variis. Non male item pro gargarismi-
bus eadem admittetur, si cum lapide & herba prunellæ aliis-
ve similibus leviter ebulliat. *Simon Pauli l. c.* annotat Rosto-
chensis cerevisiæ crama in raucedine alicujus aphoni penè
exi-

existentis profuisse. Non diffiderem juscula ex Numburgensi cerevisia, vitellis ovi, saccharo aliisque congruis rebus facta, æque salubria, ac illam cerevisiam in dicto affectu futura esse. Præterea clysteres emollientes, laxantes, & carminantes cum aliis, in scopos hos collimantibus, vel solò etiam melle aut saccharo Thom. additò, facile confici possunt, si quis iis indiget. Externè quoque præterea pro lichene & asperitate, aliisque cutis quibusdam vitiis corrigendis eadem locum invenire potest; uti & in tabe, si balnei vel linimenti in forma cum aliis adhibeatur. Et hæc de cerevisia Numburgensi prolata jam sufficiant, quibus in posterum forsitan alia plura accedere possunt, tum quæ hanc, tum aliam cerevisiam concernunt. DEO tandem sit laus & gloria in sempiterna secula; quo suspiriò his jam imponimus

FINEM.

Errata

Pag. 5. lin. 15. leg. canente. p. 7. l. 14. Conringii. p. 18. l. 12. deleatur: aut. p. 28. l. 24. pronos. p. 32. l. 2. post sensim: privet, aut illum. p. 36. l. 25. vellicatur. p. 46. l. 28. decocto. p. 52. l. 9. pro hæc leg. hanc. p. 53. l. 31. assveverunt. p. 54. l. 5. cerealis. ibid. l. 18. immodico.

Dum Patriæ Zythi propinas pocula doctis,
Apprecor ut multis profit id atque
TIBI.

*Paucula hæc Doctissimo DN. RESPONDENTI
cum voto studiis ipsius apprimè
dicato apponit*

P R Æ S E S.

Gut-

Guttura cum rapido nunc stringat solis
in æstu
sicca sitis, nec sit quo medeamur
ei.

En invalidum nobis Medicus medicamen adaptat,
hocque malum scitè pellere fauce docet.
Scilicet in coctâ Cerere est tam vivida virtus,
quam doctâ Numburg arte parare tenet.
Hujus scrutando vires, doctissime PRETTEN,
nobilis ingenii robora quanta probas?
Gratamur specimen: Felix! cervisia profit;
nec turbet sensus: Præmia magna feres.

*In honorem Nobil. atque Præeximii DN. RE-
SPONDENTIS paucula hæc ad-
jecerunt*

COMMENSALIS.

